

近代中國史料叢刊第二十九輯

沈雲龍主編

瓜圃叢刊叙錄

金梁著

文海出版社印行

瓜圃叢刊敘錄總目

滿洲金 梁息侯

重訂東華錄跋

先大父葦杭公遺稿

又序

奕廢

道光庚子壬寅乍浦八旗殉難錄序

先大父葦杭公遺稿

又跋

先伯父忠節公遺稿

咸豐庚申辛酉浙江八旗殉難錄序

先父桐山公遺稿

重印辛亥殉難錄序

金梁

節孝傳題辭

王引之

又書後

金梁

瓜爾佳氏節孝忠義合傳序

金梁

瓜圃叢刊敘錄

總目

述德記序

俞樾

貴和堂三代詩存序

金梁

如如老人詩存序

俞樾

瓜爾佳母錢太夫人壽言錄序

陳黻宸

瓜爾佳母錢太夫人挽辭錄序

沈曾植

杭州旗營紀略叙

先兄康侯遺稿

文文忠公事略叙

金梁

宗室王公世爵表叙

金梁

長白山靈蹟圖說進呈冊跋

錫良

盛京故宮書畫記叙

金梁

盛京故宮書畫錄序

徐世昌

盛京故宮尊藏錄叙 金梁

滿洲老檔祕錄叙

金梁

又序

徐世昌

又跋

林紓

內閣大庫檔案訪求記敍

金梁

內閣大庫殘檔分目敍

金梁

大婚貢婚記跋

金梁

蟹園潤上兩先生遺集跋

金梁

高郵王氏五代合傳跋

金梁

越縵堂書目跋

金梁

四庫全書纂修攷跋

金梁

瓜圃叢刊叙錄

總目

瓜廬年譜敍

肅親王

又序

陳詵

戊戌上書記序

湯寧海

甲辰廷試策書後

李稷勳

東廳文牘序

趙秉鈞

奉天旗務彙編敍

金梁

東三省遷旗實邊書序

三多

新疆交涉志序

金梁

遼政紀略敍

張作霖

盛京故蹟攷敍

金梁

奉天鄉土志敍例

金梁

黑龍江通志敘例 金梁

願學錄敘 金梁

務本篇敍 金梁

德量篇敍 金梁

又序 梁中權

瓜圃詩草敍 金梁

瓜圃藏書記敍 金梁

瓜圃藏畫記敍 金梁

瓜爾佳九忠四節三孝圖跋 金梁

省三詩敍 金梁

家父所刊叢書以關於掌故者爲多原擬名國故零刊瓜圃爲瓜圃叢刊敍錄

總目

三

龍湫故園名 先曾祖父別號瓜亭著有瓜亭雜錄 先祖父  
偶亦自署瓜山 家父曾於 盛京 東陵闢地種瓜用故園  
名自號瓜圃老人遂以改題所刊叢書曰瓜圃叢刊皆取義於  
瓜爾佳也其中初刻數種爲居東時所輯亦稱東廬叢書今彙  
爲一編當次第重刊尚有未寫定者則待嗣出憶前歲家在廷  
先生震鈞與我 父約刻八旗名賢遺著編目得數百種僅合  
刊大谷山房數集在廷先生既去世板歸劉翰怡京卿承幹印  
行 家父常以未償初願爲憾事今重刊是書尤念念不忘蓋  
篤思宗舊惜不能得先生一言以相攷訂耳甲子元旦男關東

謹書

瓜圃叢刊叙錄

滿州金 梁息侯

重訂東華錄跋

曩歲入都謁吾宗一等信勇公

盛貴於私邸始晤鶴侶主人

奕慶

莊襄親王之世子也出示重訂東華錄後附綴言於蔣錄多所訂正主人博學好讀書熟習掌故坐中有問入八分公不入八分公之義者答曰國初設議政貝勒八人其王公有奉命入坐參議者賜以八分名爲入八分此外皆爲不入八分公又有問黃帶子紅帶子紫帶子之別者曰肇興景顯爲四祖唯顯

祖派下爲宗室繫黃帶餘俱爲覺羅繫紅帶宗室獲罪降爲紅帶子亦繫紅帶而不稱覺羅直名紅帶子覺羅獲罪則降爲紫帶子

又問冠頂之始曰 國初唯朝冠中銜寶石未有頂珠之製雍正  
四年 憲廟特製六瓣蓮花托帽頂王公用紅寶石一品至九品  
各以色別頒示中外於是冠服之製始完問無不答答無不盡從  
容大雅羣服謙德又言史忠正復睿親王書尙存內閣用紅裝帖  
寫封面書一啓字上蓋有督師輔臣之印每頁四行每行連擡頭  
二十字惜不能取出同觀耳又謂成曰貴族瓜爾佳氏世代冠纓  
國初有關滿朝之號與佟半朝並稱今更盛矣酬對之間殷勤獎  
勉成既敬主人之淹雅又以所言皆有關我 朝掌故遂退而錄  
其語並請刊東華錄重訂之本與蔣錄同傳以卷帙過多未易如  
願乃摘後附綴言先付剞劂雖非全豹亦見一斑人間未見之書  
詎容久祕當亦主人所深許也鐵嶺觀成謹書

## 重訂東華錄序

東華錄瀛川蔣良驥之私錄也良驥會充國史館纂修此爲其隨筆錄記以備考訂者也夫開國之憲章列聖之鴻謨祕府紀載世人鮮覲士大夫間有鈔存俱錦函櫝匣不肯輕易示人書肆中所錄又復魚魯豕亥不堪寓目予有書癖所謂東華錄者善本既不可得因就市本逐條考證參以開國方略及通志會典傳記諸書題曰重訂東華錄每一展讀不覺沾沾自喜千金敝帚未免貽笑大方然所采錄珍聞祕籍亦多人間未見之書管豹之量於此已足或與蔣錄可互相發明歟此書本不示人昔遇觀君成爲直義信勇公之族曾館禮邸留心掌故著有瓜亭雜錄記述甚勤禮邸覽而稱善凡所載筆足補東華錄所未詳有心人也今來書

請借抄予重其爲人遂書數言與之道光戊戌新正吉旦侶鶴氏  
奕廢書於墨香書屋

道光庚子壬寅乍浦滿洲駐防殉難錄序

道光二十年庚子六月英人犯乍浦我營官兵陣亡者六人俱中  
礮死 賜卹如例七月朔鎮浙將軍奇明保至命設位奠之時成

遊宦蜀中未歸也二十二年壬寅四月英人復來犯城陷守鎮文  
武官弁各路兵勇以至合城男婦死者無算我滿州駐防大臣死  
事者一人將弁陣亡七人甲兵陣亡二百七十人甲兵因傷死者  
六人男婦子女死難者五十六人滿營數習水師陣亡五人杭州  
滿營調防甲兵陣亡一人均 恩賜祭葬襲卹如例或方告養回  
籍奉 母避於嘉郡亂定復歸郡守王君始以陣亡官弁列諸榜

招魂致祭而我營官兵男婦猶未備舉憑弔戰壘愴彼國殤何忍使忠貞姓氏湮沒不彰爰就所見聞詳訪補錄當付之剞劂以表忠烈庶與朝廷恩卹之典並垂不朽云道光二十三年癸卯春月滿州觀成

乍浦滿洲駐防殉難錄跋

我父輯乍防殉難錄書副都統長公死事事見者或以爲疑乃詳其死事情形於此壬寅四月初九日英艦隊由東獨山登岸攻胡盧城礮台公督戰甚嚴退者立正法礮中英艦多傷損艦隊驟逼台後不能守公受傷數處將殉於台左右強掖進城過湯朱橋投河復救起從人劍負出北門船至嘉興數求死者欽差英遣送冠服至公乃朝服北叩服毒死是錄書曰死事以別於陣亡足見

不輕下筆然殉國一也又何疑爲我乍自前明倭寇國朝二百餘年未遇兵禍今兩被英夷之亂妖氛肆虐滄海橫流外侮既開從此多事恨不投筆而起執干戈衛社稷追長公之後一洗此辱我國朝野上下幸勿以和議已成遂可高枕也道光癸卯暮春男麟瑞謹識

咸豐庚申辛酉浙江八旗殉難錄序

嗚呼辛酉之難我杭乍八旗合營同殉副都統武烈公諱錫齡阿父子男女全家盡節吾兄忠節諱麟瑞巷戰陣亡狀尤慘烈我弟雲瑞亦同殉難哀哉是年三月九日黎明吾兄集家人訣別匆匆出佐武烈督師余急隨至軍道遇吾兄與武烈夾騎行方馳守南門馬上驚顧各不及言孰知此即兄弟永訣時耶時偵報北門亦

被攻余持軍令督守門官程雲齡見賊擁黑旗如水至手燃礮三四發賊大退余南馳赴敵見武烈方退保內營獨不見兄左右謂南城已不守汝兄率何牛永正與賊抵戰後知吾兄身被十餘創血戰不屈賊見英偉類主帥衆環攻慘死覓尸不得亂定具空衣冠以葬哀哉武烈歸營知事不可爲迫婦孺投井父子三人率侍從還戰手刃數十賊礮洞胸腋死於陣從人盡歿無一散者忠義之氣聞者傷感乃將軍忠壯公諱瑞昌竟以乍浦失守錫齡阿不知下落入奏所遺幼子無人顧念其僕石某至抱而乞食余爲訴於薛中丞煥始代奏昭雪稱石爲義僕給資送京余復會諸士紳立祠勒碑以報忠烈亦可哀矣及事平余奉采訪忠義之命既輯杭州殉難錄復訪抄乍浦殉難錄徐君古春合編爲浙江八旗殉

難全錄彙刻流傳慨余自遭此難兄亡家破誓殺賊江南一死以報乃數載從戎屢瀕於危而終不得死至今猶偷顏人世寧爲玉碎不爲瓦全嗚呼此豈有幸有不幸哉瓦全生鳳瑞

### 重印辛亥殉難記跋

辛亥殉難記吳子修提學訪錄刊行後以遺漏尙多復修改增補梁曾錄寄吾杭營殉節官兵數人並撰外舅雲騎尉世職文榮公殉節事略請於提學願任重刊之責惜久未脫稿此本爲鐵韵錚將軍忠照初本補輯重印蓋未知提學尙有修改待刊之稿也梁

近方擬輯杭州駐防辛亥殉難錄詳述當時防議情形官兵殉難者各系以小傳與先祖父葦杭公諱觀成所輯道光庚子壬寅乍浦駐防八旗殉難錄先父桐山公諱鳳瑞所輯咸豐辛酉浙江八

旗殉難錄彙刊傳布吾杭乍兩防辛酉之亂閩營數萬人同時全  
殉吾先伯父忠節公諱麟瑞巷戰陣亡尸不可得尤爲慘烈伯祖  
觀續公竟成公先後陣亡從伯父文瑞公從叔父彬瑞公先叔父  
雲瑞公皆同殉難方志及忠義錄均有傳辛亥之變吾營死者僅  
十餘人乃姓名事跡竟多湮沒更數年後將無人能詳其始末至  
可感嘆子修提學表章忠烈海內同欽所望修改之稿迅賜繕定  
使梁得早日重刊流傳中外閱者有所觀感斯文未喪興頑立懦  
庶於人心世道或有補歟癸亥冬至滿洲金梁謹識

### 節孝傳叙

滿洲筆政圖幹恰納妻王依氏年二十而寡無子邁翁在堂謀爲  
之立後氏堅請曰撫他人子終非骨肉不足奉大宗願翁娶後姑

延似續翁感從之娶繼室生子觀成成生七月而翁遽歿氏哀其姑少寡奉養有加躬操作給衣食助其姑撫孤以至成立因積勞得腫疾猶不忍自逸事輒代其姑卒年五十有四時成已舉於鄉矣乃以節孝請於朝坊表墓門成爲余戊寅浙闈所取士通經知禮以此請題余唯孝莫大於有後撫他人子與所生異氏以爲之後者必一脉相承垂絕之緒幸而復續其誠孝不可及天不絕節孝之家通德達人他日縣宗緒而充門閭成能自樹立知必有以報其節嫂且慰其賢母也王引之拜題

節孝傳題辭書後

我先嗣祖母王依太夫人節孝傳貴州張曉瞻觀察日鑑撰采入平湖縣志道光年先本生祖父葦杭公初刻徵文林文忠公

則徐陶文毅公潤戴文節公熙湯貞愍公貽汾張叔未解元廷濟

沈孝子筠皆有題辭而王文簡公引之爲之叙言辛酉之難板燬於兵光緒初先父桐山公重繕徵文曾文正公國藩彭剛直公

玉麟李文忠公鴻章俞曲園太史樾吾宗文忠公文祥及三等信

勇公定昌各賜詩文辛亥之變又復散失梁乃搜輯再刊僅有詩

文數首餘不可得已盡付劫灰矣先嗣祖母王依太夫人輔

先曾祖母邵太夫人撫孤成立兩代先後欽旌節孝王依太

夫人苦志三十年先卒邵太夫人苦志五十年年八十乃卒及

見曾孫先父嘗述先本生祖父之言曰余以科第得官門祚

鼎盛爲一鄉望族此天以報我寡母寡嫂數十年苦節耳余又何

德致之哉嗚呼我瓜爾佳之祀幾絕復續今不過百餘年一門長

幼將及百人非兩太夫人之德烏克致此此小子不能不流涕以道之者也孫金梁謹識

瓜爾佳氏節孝忠義合傳序

瓜爾佳氏滿洲巨族也爲國初八大家之一嘗攷通志瓜爾佳以部爲氏原作夾谷或作加古又作古里甲欽定始改正爲瓜爾佳惟官書未能盡改有時瓜寫爲關亦寫爲高古寫爲顧亦寫爲胡亦寫爲古汪是以有關高顧胡汪姓之瓜爾佳又車克曾蒙賜姓是以有覺羅之瓜爾佳又石廷柱之父石翰以名爲姓是以有石姓之瓜爾佳瓜爾佳族最繁而以關之一派爲尤著世繼簪纓日益光大當時有關滿朝之稱何其盛歟又攷瓜爾佳有新舊族之別在關外者爲舊族在關內者爲新族新族入關總有九

族族約百戶大宗既著籍於京旗其餘八族分調駐防今遷浙者爲小宗三族與遷楚之小宗四族本爲兄弟生養日繁戶口百倍蓋自國朝定駐防之制八旗子弟京外分遷而瓜爾佳之族滿天下矣又攷杭州之瓜爾佳亦分二派有遷自京城者有調自楚防者而我族實爲小宗三族之一先自京遷杭繼調乍浦繼復歸杭州前後二百餘年傳至今凡九世今一門長幼已七十餘人我瓜爾佳之族之盛不更可見耶夫瓜爾佳氏在滿洲爲巨族論八旗氏族者必首數之今則南北各省凡設駐防之地無不有我瓜爾佳氏之尺籍攷其約數當居滿洲全族之半食毛踐土世受國恩我瓜爾佳之族又安可不知自立而思圖報者哉梁嘗有志爲我瓜爾佳氏攷源流明世系以修氏族譜蹉跎十年未遑從事

今者幸歸宗國思理舊業觸目山河乃不勝今昔之感嗚呼遼雲  
茫茫何處故鄉東望長白山高水長梁復何心空言著述也節孝  
忠義合傳既成有以瓜爾佳氏族相詢者乃更述其概略如此戊  
申歲暮金梁書於滿洲故里

### 述德記序

述德記者金錫侯侍御述其封翁桐山先生之言行錄也先生幼  
奇慧七歲能詩善書畫博學書無不讀壯遊四方足迹遍天下嘗  
從李文忠殺賊江南克太倉攻和州戰績甚著功成不受賞長揖  
歸田廬文忠嘗稱爲非常人先生廣額豐髯狀貌凝重老而彌健  
精神矍鑠如壯年性孝友寬仁而愛人器度豁如終身守忠恕之  
道慷慨好施與數亡卹孤口不言惠一鄉皆稱善士有嗜古癖金

石書畫羅列一室終日摩挲不去手尤樂山水四上峨嵋嶺兩登  
泰嶽觀日出晚年隱杭州日遊湖上一溪一石無不窮其所至自  
述一生所歷最奇旣備嘗艱苦亦久享清福嘗手書聯語曰好學  
近乎智力行近乎仁知恥近乎勇有爲者亦若是富貴不能淫貧  
賤不能移威武不能屈此之謂大丈夫浩然之氣常足感人見者  
無不頌先生之充養有道焉余昔曾以文爲先生壽又嘗序其詩  
集今讀是記見先生之言行有不可及者文忠非常人之稱良非  
虛譽余旣敬其爲人又感錫侯之孝思遂復爲題而歸之曲園老人  
俞樾

貴和堂三代詩存跋

貴和堂三代詩存一語花館詩拾 先祖父葦杭公著舊刊六卷

咸豐辛酉之亂板燬無存此本從杭州府志平湖縣志乍浦備志各書中摘鈔得詩九首拾於灰燼之餘故曰詩拾一忠節詩遺

先伯父忠節公著 先伯父辛酉巷戰陣亡覓尸不得遺稿盡失僅此哭副都統長喜公死事詩蓋道光壬寅年作內有馬革裹尸臣所甘之句孰知公之殉節並尸不可得耶此爲亂後 先父抄存故曰詩遺一如如老人詩有 先父桐山公著先父有詩草八卷行世是本爲俞曲園先生選存故曰詩有一留陰閣詩剩

先兄襄侯杏梁著 先兄善作八分書曲園評謂能得漢碑胎息工琴審音律詩不常作此爲 先兄故後長姪熊飛錄存之作故曰詩剩四集合爲一編題曰貴和堂三代詩存貴和堂者吾家舊宅堂額爲 先祖父手著蓋取禮之用和爲貴之意云金梁謹識

如如老人夢花館詩序

桐山封翁名鳳瑞自號如如老人所著夢花館詩草諷諭閒適如  
香山長歌短律如老杜不求雕飾出語老嫗都解其中時有見道  
之言五律如書懷云芽屋詩情淡菜羹飯昧甘答慧欽使成云時  
衰文字賤道在布衣尊雜感云詩文供劫火溫飽恣公卿除夕云  
句巧謀生拙人窮文字工又云魔深真見道寒極釀成春老去云  
好花容易老奇句偶然成又云人老親朋少家貧子弟賢浮雲山  
人索全稿代付梨棗詩以謝之云練句求工易刪詩割愛難七律  
如自嘲云百過書無三日熟眼前事每隔半愁又云山水每驚他  
處好文章但覺自家新春夕云聊假一塵充小隱偶從深夜發幽  
思山居云佳句天成今偶得古書人著我消閒秋懷云詞句新奇

人漸老文章平淡昧偏長述懷云大手文章憑德慧放情快樂仗  
胸襟又云傲寒不覺冰霜冷吃苦方知藥石甘又云胸有素心能  
警語身無傲骨豈奇才五絕如九歲登黃鶴樓云黃鶴樓中坐長  
江萬里橫我來無玉笛長嘯兩三聲七絕如感事云千金不足我  
酬恩一劍何堪了宿冤遊俠傳亡朱孟死居然仁義到侯門哭兄  
云男兒報國死何雄戰歿沙場是善終最痛裏尸無馬革淒涼玉  
碎瓦全翁五古如雜言云自謂吾有用無不誤蒼生自謂吾無用  
何以慰吾心荊公周官學青苗終不行新莽井田制適足擾萬民  
誤用一小人雖病病猶輕誤用一君子病入膏肓深七古如郭令  
公云君不見唐朝天子禮泉宮賊來一朝走之空中流傑出爲砥  
柱隻手扶傾郭令公凌烟圖象偶然事難乎烏盡藏良弓朝奉朝

命夕就道檻車誰復識英雄青蓮學士飄然至從容軟語回天聰  
要知天下真奇士多出區區布衣中苟能跳出塵圈外只合終身  
作臥龍不然再効漢留侯功成之後從赤松至理名言發人深省  
可作古格言讀可作座右銘觀余昔贈封翁詩有試從詩境窺胸  
次定有奇光上燭天之句蓋非特詩人之詩而已封翁爲詩亦多  
寫景敘情之作五言如胸隨湖並濶醉與柳同眠久雨花如醉初  
晴鳥亦閒七言如細雨如絲風欲斷層雲作幕月偏穿日漾水光  
驚去鳥風翻荷葉露藏花等聯又如酒肆題壁云尋詩足跡徧天涯  
常醉山家與酒家不是隄邊楊柳緣竟將白李認梅花採蓮曲  
云郎若採花休採葉好留荷葉蓋鴛鴦即景言情善於狀物不求  
工而自無不工余尤愛之封翁自狀其詩有句云我詩如鳴蟲噭

噉出幽谷我詩如村婦亂頭且麤服其實詩境不似封翁之詩豪  
歌逸唱當譖大江東去其中挾有雄俠之氣我意其人磊磊落落  
吐氣如虹不能以尋常詩人目之也愚小弟俞樾

瓜爾佳母錢太夫人壽言錄序

丙辰仲夏吾友息侯爲壽其母錢太夫人徵文海內茲復彙輯所  
徵詩文爲壽言錄而問序於余余識息侯近二十年矣息侯故吾  
浙奇傑士聲譽動一時初見時息侯方少年志銳甚議論古今天  
下事滔滔不絕於口無窮時古焉敬通杜牧之之流也後三年見  
之善談論猶昔日而英氣內含時時自歛抑不復如前之圭角嶄  
然余以是知息侯之有進也又二年余居京師與息侯數數見相  
與從事久觀其汲引同類皇皇若不及與人交言無不信勇於從

善而不以聲色加人則藹然一性情篤摯古君子也又七年見之則貌益加溫氣益加和言論益平易近人而色然若有深憂於當世者余以是益知息侯之有進也念余自稍有識知以來迄於今頽然將成一老人而剛戾不平之氣無少貶意矜而才厲與世人常齟齬吾道德之進也無日矣以視息侯輒自慚形穢面目無可施息侯之進德亦銳矣然我又曷知息侯進德之銳之成於其母教歟當戊戌庚子之交息侯上萬言書再伏闕海內相傳頌其文而母曰汝務虛名召實禍吾爲汝慮也息侯壬寅舉孝廉甲辰成進士入詞林保御史閣部復迭舉賢才而母曰汝微倖無實學可愧勿可喜也後以閣員值內廷兼會議政務處公卿交相推重爭羅致之先後聘調者歷部凡四而母曰汝無兼人才我懼汝力已

竭也戊申息侯自京蒞東省爲旗民籌生計致歟逾百萬旋出守  
新民濟柳河之災民謳歌思之至今而母曰汝有何德而致民之  
感若此也息侯富著作所言皆修身治民之要而母曰汝欲崇道  
德勵風俗徒著書無益也故息侯學益修名益盛位益顯而母之  
教益備亦益嚴夫息侯之所以奉其母教者至矣是古養志之道  
也息侯亦賢矣然非其母之賢不及此語云有賢母而後有賢子  
豈不然哉抑余又聞母平日喜鄉居不願隨子入官府息侯嘗以  
不獲朝夕侍養爲戚雖然我謂母於此有遠慮焉夫唯四方無虞  
天下太平之日當官者有家國交盡之義顧人子之心而乏意外  
之變循分供恒職得出其餘暇周旋於骨肉之間叙家庭之愛怡  
怡聚首歡愉一堂不復知有室間離別之苦可謂極人生天倫之

幸事若夫身世多故值風聲鶴唳草木之驚舉目左右險巇萬狀敝屣衣冠去留轉瞬故在官常有慄慄不自安之象間關奔走之勞經其外而河山風景之異感於中爲賢母者其何以爲情乎此錢太夫人所以不樂其子有迎養之舉也雖然余又謂誰實爲此而令人子一行作官而母之賢者不以從其子入官府爲可樂此則世變之大不可言者也然孝莫大於養志迎養與不迎養於息侯又何閒焉夫以息侯之賢而又有錢太夫人賢母之數余又知息侯異日進德之將無已必不僅如余昔者所見於息侯也然則余又烏能無言哉然則余又烏能無言哉瑞安陳黻宸頓首拜書瓜爾佳母錢太夫人挽辭錄書後

賢哉錢太夫人教忠教孝古之賢母也其詩嗣息侯觀察方少年

時三上萬言書以忠直名海內世所稱滿洲瓜爾佳也近久遊遼東客帥幕佐戎政丙辰春洪憲稱帝遼帥首起抗之太夫人馳函訓其子曰聞府主孝義可風當以國士報汝夙慕諸葛忠武獨不能爲王清河乎此教子之不忘本也丁巳之變息侯潰而假歸太夫人愀然不樂曰天道變矣汝歸良佳然今非獨善其身之日豈不聞盡人事以待天命乎此責予以大任也息侯重輯辛亥殉難記並集忠節遺墨爲一編又戒之曰汝徒慕忠孝欲藉空文以自飾不值一錢天下後世能諒汝之心乎此督以大義知事急直不容一日自逸矣有此母乃有此子數忠數孝賢哉太夫人也吾聞遼帥事親孝冒必稱母嘗自述其母在時訓以報國恨不爲亘古一人今又得賢友自輔同心協力撥亂世反之正非異人任億息

侯昔爲太夫人壽余祝以詩云景風遼海上還貢一籌新蓋知兩君皆忠孝中人夙興夜寐毋忝爾所生必有以報在天之靈也

沈曾植拜題

杭州旗營紀略序

滿州駐防順治二年立西倚大城東抵大街南距湧金門北跨錢塘門築砌界牆環九里有餘穿徑二里實居省垣之西隅出城跬步卽爲西湖山川秀麗道路坦達寺觀祠宇皆前代名蹟卽坊巷市塵亦多宋元以前之舊址自南而北有石道爲御蹕 聖祖南巡時所築湖水由南引入城爲小河夾隄植桐柳綠蔭清流頗饒勝景風俗敦直尙武知本自 國初遷杭二百餘年未嘗染穢習與民人交彬彬有禮爲地方所稱重婚嫁禮儀仍守舊制加以通

變士習明達亦識時務教育新學常開風氣之先尊君親上尤明  
大義同營六千人雖婦孺莫不具誓死報國之精神蓋能不忘本也夫浙江爲東南瀕海大都會杭州駐防與乍浦水師屹然相望頗占形勢地不過數里人不過數千而庚辛粵匪之亂禦賊十萬堅守二年全城賴以失而復得居民至今稱頌不衰及城陷閩營同殉忠義之氣尤足感人國初之定兩浙康熙之平三藩道光之籌海防以及咸豐之嚴城守常以此爲重輕凡我旗人世受皇恩教養訓練實與國同其休戚人孰無心豈可不激發奮興以圖報稱者哉近者方議變通旗制余弟錫侯集同人設八旗調查會於京師思爲八旗籌生計爰就平日見聞所及參錄舊檣爲述此編遺漏舛誤知必不可少特誌大略以備參攷而已戊申春

月椿梁識

文文忠公事略跋

吾宗文忠公文祥歷事三朝以身繫安危者二十年其謀國

之忠事親之孝持躬之慎待人之誠不愧古大臣風先父常與

兒輩稱述軼事嘖嘖不絕於口以爲宗族光先父亂後隱居不

仕公嘗手書請出山先父謝以詩云敬謝吾宗賢相國艱難宏

濟讓公忠答和有西湖自古多高隱山水太佳誤此公之句自公

薨久不通音問及戊申秋梁出關先謁兩陵復祭直義公費英

東之墓並訪公故宅知後裔零落繼起無人宅已易主其京中舊

居在正陽門內中街亦歸他姓僅存門額題曰文文忠公故宅余

頗思贖歸立爲宗祠卽附祀公位於中迄未如願然公之清風亮

節至今談者衆口皆同足見忠信篤敬至誠感人其盛德故沒世不能忘也是集刻於光緒初板藏京宅已燬於兵今重刻之並搜輯近人筆記有述公軼事者附錄於後以誌景仰云宗愚侄金梁敬跋

宗室王公世爵襲次冊跋

定制玉牒十年一修分藏大內宗人府盛京大內各一部  
梁客秋調奉正審辦恭迎玉牒大典禮至隆重幸得躬逢其盛時欽派禮親王世鐸護送到省恭藏於盛京大內之敬典閣錦函寶匱盈室難容梁擬請編簡而藉備查檢以例禁私閱不敢違也梁方官旗務使司兼管宗人府宗室王公遇有襲爵等事均歸承辦遂查司存譜牒輯爲圖表自和碩親王多羅郡王貝勒

固山貝子奉恩鎮國輔國入八分不入八分公爵國輔國奉恩將軍莫不皆備存者名用朱歿者名用墨其下詳注封襲世次年月彙成一冊頗便考查雖不及玉牒之詳而天潢貴胄凡有爵人員大略均載於上敬謹繕印分貯公衙並呈禮親王賜閱或以直書名諱爲嫌王曰官書不必避也此固官書體例宜然然王之謙德自不可及後之覽者當不更有所疑歟己酉春金梁敬書

長白山靈蹟圖說進呈冊跋

宣統三年春王正月東三省總督臣錫良恭請敕建神祠於長白山以昭靈蹟並進山景全圖具摺奏稱竊長白山乃國家發祥之地鴨綠圖們松花三江皆導源於是東達日而南連韓爲今日中外國界所闢我朝誕膺景命備迓天庥神鵠朱果紛

綸歲蕤之符天池龍岡磅礴蜿蟺之氣聲靈有赫馮翼無彊舊傳  
天女降臨 聖神載誕浴池靈蹟實在布勒瑚里居中位而定  
一尊絕地通天人蹟罕至自奉 聖祖仁皇帝諭遣內大臣覺羅  
吳木訥等看驗遙祭之後百年神祕悠久莫宣近以籌邊設治長  
白安圖分設府縣臣前委員勘查國界特飭調查山境攝影全圖  
嗣經記名副都統奉天旗務處總辦臣金梁具圖貼說呈送前來  
臣敬謹捧觀詳稽 聖蹟溯發祥之有自信符瑞之非虛紫氣炳  
霄丹陵毓慶天生 神聖良非偶然謹將全圖恭裝成冊進呈  
御覽臣伏念太皞降生虹彩繞華胥之渚姬周受籙房心應蒼帝  
之精自昔興王恒徵瑞應我 朝發祥基業媲美幽岐 天女神  
靈萬年作佑臣下曷敢妄議禋祀竊考金時封長白山神爲興國

靈應王卽其山北地建廟宇又冊爲開天宏聖帝 本朝康熙十七年尊爲長白山之神歲時致祭崇報特隆今擬恭請 教建神祠於布勒瑚里擬名爲 教建長白山之神之祠以保 靈區而昭 聖蹟查東省邊防孔亟國界待勘黑水白山正天之所以限中外今誠建設神祠立碑正界旣以明主權之有在亦足爲界務之先徵如蒙 俞允當由臣飭令興工修建早觀厥成庶 皇圖鞏固合神契而耀祥符 聖奧莊嚴隆上都而光萬國山川毓秀河嶽効靈而一祠千秋與 國家億萬年有道之基並垂百世矣

奏上奉 碣批覽欽此臣金梁請將山景全圖鑄銅刊石題曰  
艮白山靈蹟圖說進呈冊頒示全國京外傳觀以昭 靈蹟時臣錫良方奉 恩准開缺回京臨行爲錄前奏於此以代恭跋焉臣

錫良敬書

盛京故宮書畫記叙

盛京故宮珍藏頗富首推古銅都八百件西清續鑑詳載圖說其次瓷器凡十萬件建樓陳設其次書畫翔鳳閣藏四百餘件別殿陳設亦及此數其次圖書文溯閣藏四庫全書各殿亦多古籍而戰用遺念各品甲冑孤矢亦可爲一朝興廢之紀念若珍珠串鑽石刀見者駭爲奇物僅可聊備一格而已余戊申秋出關適唐專使奉命聘美特過瀋陽取佳瓷數件挾之西遊謂備贈遺國主之用方聞而訝之次歲有英人希吉納者曾爲埃及元帥好瓷成癖老而繯居自謂撫兵如子而愛瓷如妻聞東都藏瓷之美來請瞻視索贈青紅小花揮竟亦予之母客事尤可怪嗚呼藏珍雖富又

能禁幾人予取予携耶余時兼司典守之職別議立博物館繪圖  
訂章奏明建設並聘通人編纂目錄記要以備攷查議方協而余  
即去職誰書畫一類爲余與余鐵珊瑚及金月洲諸君主纂幸已編  
輯過半事既中輒遂亦無人過問矣去秋余自濱江到奉舊地重  
遊前塵如夢鐵珊瑚歸悵望天末月洲晤面相對欷歔遂索舊稿  
摘要重錄雖不及原纂十分之一亦足略見一斑匆促成篇無復  
次序猶憶其中所藏倪雲林古木竹石圖有王璲氏題詩云流光  
冉冉逐驚波文物空思晉永和遼鶴重尋舊城郭當時風致已無  
多歲月驚心河山觸目重檢至此百感蒼茫不自知涕淚之何多  
也癸丑春金梁

瓜圃叢刊叙錄

盛京清之豐鎬也天府珍異之品分儲於故宮者二百數十年來代有所增余曩督東三省兼將軍並管內務府大臣事房序寶器職在典守以宮廷歲久頽敗葺而新之凡所儲藏門分類別重加編錄自彝鼎圖書之重下逮一木一羽之微莫不詳其名數嚴其局鑰後者相承無敢忽也金子梁是錄蓋在余既去東之後仿石渠寶笈例而作者也卷軸冊幅聯額以類相從尺度標題纖悉備志都四百九十件皆庋於翔鳳閣者未及其他而值政革盡所藏諸物輦致都下入古物陳列所金子握筆旁皇悵悵而靡所之比來都將以所錄付剞劂而乞叙於余安可無一言以塞其望雖然一夢瑤媛早成泡幻所懸諸心目而足發攷古之一喟者又豈僅書畫而已哉水竹村人書

盛京故宮尊藏錄叙

盛京大內宮殿崇德二年建居城中央大政殿爲議政大殿宮闈在大政殿之西正中爲崇政殿本名篤恭殿殿前東爲飛龍閣閣後直房七楹稱東七間樓殿西爲翔鳳閣閣後直房七楹稱西七間樓殿後爲鳳凰樓再後爲清寧宮其東院爲敬典閣西院爲崇謨閣而文溯閣更居其西此宮殿大制也各殿陳設均恭貯飛龍翔鳳兩閣及東西七間樓此冊所錄者是也今皆移至北京歸古物陳列所於文華武英兩殿陳列展覽文溯閣所藏四庫全書亦同移京唯翔鳳閣後西七間樓所存殿板圖書崇謨閣尊藏列朝聖訓實錄實錄圖老檔冊舊檔案敬典閣尊藏玉牒均尙留存是冊所錄詳載陳設殿閣實仿宮史體例宣統初年梁兼管內務

府事本擬詳編分類細目並請設皇室博覽館以永保存奏上不報僅將書畫一類編次而辛亥之變起矣甲寅重至東都故宮荒閉寶物一空大政殿前且爲駐兵之所言之主者飭隊移讓略修宮殿少復舊觀已非昔日莊嚴之象近者中外過客時請遊瞻爰取是冊重加編次與書畫錄並刊後有來者覩故宮而思故物手此小冊或亦足爲攷古者之一助歟金梁

滿洲老檔祕錄序

盛京故宮舊藏滿洲老檔一百七十九冊分紀天命天聰崇德朝事多三朝實錄開國方略東華錄所不載見所未見聞所未聞誠三百年來之秘史也創本爲無圈點體滿文字近蒙古與通用滿洲文字不同繙繹至難經滿漢文學士十餘人之手費時二載今

始脫稿當分編百卷以卷帙過多校刊非易遂擇要摘錄名曰滿洲老檔秘錄分上下兩編先付繕印此不及全書二十分之一以索觀者多聊快先睹云爾戊午中秋瓜圃老人金梁

### 滿洲老檔序

魏書之撰國記不傳元典之編秘史未出遂致兩代創業事跡多有闕略識者病之有清之興神功聖德度越漢唐顧於開國實錄本紀累有修改時秉筆者芟落過多甚於國名其初稱金見檔冊其他可知金子息侯久官東夏勤搜故府得滿洲老檔譯爲百餘卷又撮其要仿記事體編爲一書取而誦之其可以窺繙造之艱難而補舊史所失載者蓋未可以一二計陸賈之楚漢春秋班馬資之溫大雅之創業起居注賈緯之唐年補錄涑水采之意修史者其必

取此尙將徵考其全文與博採類此者之紀述以餉修史者而昭有清功德之盛則所素志也夫徐世昌

滿洲老檔跋

我朝發祥漠北入關以後世祖聖祖以深仁厚澤治於民心至今舉踵思慕臣紓以犬馬餘生八謁崇陵豈惟顧戀國恩亦我列祖列宗親學重士淪浹人之肌骨爾嚮者清史館既立總裁趙爾巽亦叙名及紓後寢其議臣紓家貧無書復不能製爲私史以闡揚先皇帝之聖德晝夜隱痛但爲紀哀之詩抒其黍離之悲而已屬者前進士金梁在陪京恭檢舊檔得太祖太宗創業時文件較宋臣司馬光涑水紀聞爲詳其賜明臣毛文龍袁崇煥數書東華錄亦未全錄梁乃悉心皇室恭繕成

帙臣紓敬讀數過悲感無盡謹跋數言歸諸梁梁方撰陪京通志也宣統庚申舉人臣林紓謹跋

內閣大庫檔案訪求記叙

內閣大庫檔案宣統年清理 奏請銷燬羅雪堂參事言諸南皮張文襄公移存國子監裝八千麻袋辛酉年立歷史博物館於天安門由監移往略檢其整齊者陳列於樓以誥勅及 廷試策爲多餘貯城下視爲廢紙壬戌春有持硃筆抄諭題本之類詣梁求售審係大庫存件詢其來處堅不肯言亟以重價餌之寶沈靈宮保亦見數紙梁展轉訪求終不可得後忽憶前數年在悅古齋主人韓某處曾購題本經筵講義 高宗硃筆批改聯語等件亦大庫物立往訪韓竟能知其詳謂同懋增紙店實購自歷史博物館瓜圃叢刊叙錄

八千袋費四千金將運往定興縣紙坊重造紙料聞之大驚乃定期約雪堂沈震偕往同懋增則謂車運造紙已過半矣僅檢留數袋立許五百金携歸並囑速追餘件當三倍其原值酬之往返兼旬居然陸續運還堆置彰儀門貨棧卅餘屋連前後五院露積均滿高與簷齊卽付價萬二千金寄存商品陳列所大樓延招十餘人排日檢視頗多珍異之件如滿蒙文遼事例金事例元事例皆史冊秘稿明題本行稿等皆有關邊務戰事清初檔冊皆開國方略硃諭批摺亦至可寶如朝鮮琉球安南等題表有言事者亦關掌故又見蘇祿國表獻版圖 高宗硃批嘉獎末言願獻版圖一節著毋庸議尤所未聞餘不勝舉當另編目錄時知者絡繹請觀東海擬收歸國有外人且重金求讓清史館亦商請收藏雪堂均

不許整理間商部某忽勒令移出不得已覓質善果寺餘屋連夜遷入雪堂以常寓津沽特闢庫書樓先運小半分存之其餘尙留寺內待明春重檢理焉此項庫書爲明清二代國故所關幸得雪堂先生一人之力初將銷毀奪於火劫終將造紙奪於水劫殆有天意存乎其間抱殘守闕力可回天庫書猶其小焉者爾又庫書歸雪堂以外亦有流散曹理齋徐敬宜諸君均有所獲天津王某某得明崇禎十五六七年禮部堂稿獨全又北京大學馬叔平教授諸君亦頗注意此事梁知歷史博物館散存各件尙多可取曾與言之後聞於大學設檔案整理會移往整理分類編目並開古物展覽會陳列展覽爛然可觀亦有心人也壬戌冬金梁

內閣殘檔分目叙

內閣殘檔分二次散出一在宣統初一即壬戌年分目所載宣統初散出者爲多時梁方官奉皆孫君伯恒向悅古齋陸續購寄尙有經筵講義數千本爲張劭予師所得其餘聞均重毀造紙遭水劫矣分目不過全檔萬分之一所望雪堂及大學諸君清理竣事早編全目庶成大觀又盛京大內有滿洲老檔一百七十九卷均記天命天聰崇德年事較三朝實錄倍多梁有譯本此亦與內閣檔案互有攷證梁久擬付刊藏稿十年不識何日始償此願也壬

戌冬日金梁

大婚貢賀記跋

壬戌春聞大婚典禮將於秋冬間舉行寶沈盦宮保羅雪堂參事適同集梁處談及同治年婚典經費用銀千萬兩光緒年較減亦

六百萬兩此次籌備僅擬三十萬兩內庫久虧尙無的歎聞京外  
耆紳多情殷貢賀不可無人接洽擬請內府分別通知或以省事  
爲主慮招人言實則婚典大慶人無論新舊時無論今昔聞者欣  
喜此人情之常無關利害何所用其顧忌殊可嘆也乃與雪叟約  
各以私函分知友好大江以南雪叟任之東北各省梁任之西北  
各省請吉帥函知之各處聞信無不欣然從事劉翰怡京卿於上  
海聯合各省寓公廣州溫毅夫貴州胡晴初兩同年各約師友合  
力備貢吉期既定京外新舊人員羣入貢奉統計進三十萬金貢  
品尤多蓋東北至東三省呼倫貝爾西北至甘肅西至川邊南至  
南洋羣島凡在有心莫不爭起觀獻焉十月十三日爲大婚吉  
辰羣請觀禮鳳輿過處夾道男女歡欣鼓舞肅靜無譁十五日

朝賀在乾清宮行禮集至千人以上衣冠肅然外賓亦到二百餘人皆嘖嘖稱美以爲十年來未有之盛舉梁於翌日招宴入賀同人合撮一影留作紀念凡貢賀人員均有回賞書畫物品分別頒發聞匾額多御筆親書羅參事蒙特旨召見賜貞心古松四字異數也又賞生計維持會振歟二萬元遂以萬元放內外城冬振藉廣皇仁以萬元作貞苦堂基金永戴帝德父母孔邇萬姓騰歡何其盛歟旣誌大略並將貢賀人員冊及籌備大婚奏牘章程編輯付刊以紀盛典此亦一朝掌故不可不誌也壬戌冬金梁

龍湫澗上兩先生遺集跋

勝朝遺逸吾幼即慕李蟹園徐俟齋兩先生吾家龍湫故宅爲蟹

園遺址中有舊池 先叔父鼎瑞公道光壬寅之難投池自殉  
先母錢太夫人家黎里即澗上今草堂已改爲祠宇吾自幼習聞  
兩先生軼事日與亡弟文梁互教其言行以爲戲樂童子無所知  
欲學爲餓死乃竟絕食終日病幾殆 先母詞之曰餓死事大豈  
孺子所可學耶則大駭怪何爲以忍餓定古人品節而不知君子  
固窮此中自大有學問後之人不能忍此須臾遂一錢不值大抵  
爲口腹所累耳弟幼奇慧後天亡吾哭之慟忽悟死生之理人生  
數十寒暑泰山鴻毛唯我所擇始漸知兩先生之高節不可及也  
及少長讀兩先生傳記深慕其爲人常思搜輯遺文爲刊專集久  
而未就去歲南歸掃墓聞 先伯父忠節公墓碑爲人毀佔急往  
修復擬就龍湫故宅改建鄉祠祀蛋園先生及忠節公旋於市上

得乍浦集詠乍浦備志則璧園詩文略載於中惟瀾上全集不可

得偶與上虞羅雪叟振玉言之乃知兩先生遺集雪叟刊傳久矣

於是借歸抄補題曰龍湫上兩先生遺集請重爲印行昔先

父藏有璧園手銘團硯卽拓諸卷首並詳其始末於此知吾家與

兩先生頗有淵源今合刊遺集冥冥中若有人爲之作契焉癸亥

歲暮金梁敬識

高郵王氏五代合傳跋

高郵王氏與我爲通家先祖父葦杭公舉於嘉慶戊寅科實出

文簡公之門嘗爲我節孝王依太夫人傳題辭其後先伯父忠

節公先父桐山公與忠介公常通音問及忠介父子殉節武昌

先伯父陣亡乍浦亂離之後數十年兩家不相往還久矣及

梁

入都聞王氏後裔尙有在京爲部曹者遍訪無人知之亦不識是否文簡公嫡支也某年英斂之華約集且住樓丹徒馬湘伯先生

良論近世學術王氏三代繼業極推重之席間蔣梅生棻忽謂王

氏遺稿庚子前其後人抵責寄存尙盈數巨篋在其處也後梁往

觀皆懷祖先生及文簡公手草中多未刊之稿著書而外亦多文

札間有忠介詩文制藝閱之驚喜遂乞梅生以精輿昇之歸羅雪

堂參事振玉願任校訂劉翰怡京卿承幹慨允刻資擬先刊三代

文集王靜安供奉國維編次已就唯文簡公所撰段茂堂傳數檢

不得又相傳懷祖先生有効和坤疏亦無存草雪叟詳閱嘉慶四

年奏見首卽言此事乃知別無專摺也梁復得文肅公行狀懷祖

先生墓誌文簡公墓誌忠介公行狀及其子恩晉殉節紀略又其

女貞孝王姑事略蓋忠介有孝女立志不嫁侍母撫侄 欽旌貞  
孝忠孝一門尤不可及也遂合爲一編題曰高郵王氏五代合傳  
昔文簡公曾爲節孝傳題辭 先祖父 先父生平撰刻皆表彰  
忠孝恨不能復起於地下題此冊以報師門所望王氏後人見而  
問訊重訂通家之好則幸甚矣金梁敬識

越縵堂書目跋

右越縵堂書目計八百餘種李繩客先生批校者多內注明手校  
本九十餘種手批本百餘種手跋本五十餘種手序記本五種手  
抄補本五種校勘記勘誤記各一種合二十八箱尙存李氏後人  
處癸亥孟秋陶心雲先生之公子殷勤作介索直萬金余以書在  
會稽取讀非易不能遽決去留頗思他日南歸之便泛舟東湖遊

蘭亭謁禹陵還登越縵堂訪純客先生故居盡假一觀先生好讀書多剏解校誦甚勤想日記所錄未盡十一以外定多獨到之論空山風雨尙友古人亦一快事此書不必定歸我有倘能欣遇同心卽就先生故宅設立藏書樓以留鄉賢遺蹟爲湖山生色豈非一時佳話歟金梁

四庫全書纂修攷跋

四庫全書集古今學術之大成一朝盛業古所未有也初朱筠請校錄永樂大典乾隆三十八年癸巳始命紀昀陸夢熊陸費墀等纂輯大典內之散簡零編並蒐訪天下遺籍不下萬餘種彙爲一書賜名四庫全書壬寅春第一部告成奉置文淵閣閣建於文華殿後專貯四庫全書凡三萬六千冊冊面依春夏秋冬四色經部

用青色絹史部用赤色絹子部用白色絹集部用黑色絹分別裝潢以法四序且便檢閱癸卯春第二部全書繕竣命送往盛京文溯閣第三第四部陸續亦繕竣分貯御園文源閣熱河文津閣甲辰年復命繕寫全書三部分存揚州文匯閣鎮江文宗閣杭州文瀾閣降旨謂江浙人文最盛士子有願讀中祕書者許其領觀傳寫以廣文治又命于敏中王際華於全書中擇其尤精者別爲四庫薈要凡一萬二千冊分繕二部一貯大內摛藻堂一貯御園味腴書屋仍按四庫陳奏堂中計全書七部薈要二部前後凡十餘年始一律告成按明永樂大典初命解縉纂集類書爲文獻大成嫌其未備乃命姚廣孝重修五年告成凡二萬二千二百十一卷一萬一千九十五冊四庫全書較多五倍又大典於經史皆依韵

編次割裂凌舛漫無統紀有乖柱下藏書之義四庫以經史子集爲部次體例實較醇整然二書各有取義分之兩善故不必相提並論也今大典久已散亡四庫全書文源一部既與圓明同燬文匯文宗亦歸兵燹文瀾餘燼鈔補未完文津移藏京師圖書館文溯運存古物陳列所唯文淵一閣巍然獨存其薈要貯大內者梁曾言之內府遍檢未見已在若存若亡之列不可問矣憶已未冬徐東海師屬編文華武英二殿陳列古物目錄梁請先印四庫全書並擬續修四庫書目蓋書不易續目則易修二百年來新出書籍將倍於前姑存其目以待後來所謂不得已而思其次耳又以全書舛誤至多且卷帙分割亦與原本多有異同當作校勘記各附卷末以爲攷訂時葉玉虎恭綽適遊歐美歸謂西國重東方文

化頗稱此書亦請印行傳布陳援菴垣遂往圖書館檢查全書撰爲書目攷異凡卷間葉數一一注明又關於勅修四庫之記載亦摘錄甚詳梁借錄一過略加整比間有增補題曰四庫全書纂修攷所望與全書早日同刊流傳海內外使中原文物照耀全球此世界文化所關亦吾國之光也金梁

瓜廬年譜序

錫侯出示年譜有其友人題曰金文忠公年譜錫侯與滿洲文文忠公祥爲同族久著直聲常以文忠自勵宜其友亦以是勉之也昔魏文貞公有言願爲良臣不爲忠臣夫忠如龍比故非得已然事君能致其身鞠躬盡瘁死生以之良臣忠臣又豈可強爲區別乎錫侯方奉奏調綏遠之命乃來別忽改赴遼東謂東事日亟

滿洲故鄉不願辭難就易錫侯之勇於任事不忘故土亦可謂之忠矣詩云王事靡盬不遑啟處又云四牡項領蹙蹙靡所騁勉哉錫侯忠信篤敬雖蠻貊可行所望自勵勵人能繼文文忠之後光大其族而勿負盡忠報國之志也光緒三十三年戊申肅親王

瓜廬年譜叙

當戊戌己亥之交新政始萌芽蓬門佔嘆之士咸恍然覩天日舍其舊而新是謀時則吳山之右錢江之旁明聖湖之側山水秀麗人文淵渟之藪有所謂瓜爾佳其人者以一譽之俊奔走呼號唱大論之端萬言痛哭伏闕上書磊落雄壯英神以茂四鄰賓客入者說出者譽光名滿天下余蟄居鄉曲聞而心嚮往之以爲執鞭所忻慕焉甲辰夏五乃獲識荊州於都門一見握手如舊歡文采

葩流藹然親人私幸雖萬戶侯無以易此既而余返江南公羈冀北其睽隔者又三年雖音旨杳渺而其人固無日不在心目間有時盛誇諸友朋津津道之不自覺其口角之流沫無已也丁未暮春余又以京宦吹竽國門始得斯夕過從公寓追隨譚笑詩酒流連每至夜分不醉忘歸公子公女頭角嶄然睢睢盱盱繞公膝下公與之陳說詩書嬉戲俎豆有時相與互持竹木兵俳優角觴爲戲風旋鳥鶯婆娑式舞於院落中春氣洋洋盈門庭曰吾少時爲此先父老母在堂上顧而怡樂今思之猶如隔昔每形諸夢寐不能頃刻忘吾以效老萊班爛綵衣弄雛鳥於親側耳烏虞公之孝思不墮如此公性閑達英姿卓立而風度凝遠人莫涯其量宦京數載聲譽雀起龍躍雲津鳳鳴朝陽童稚婦女無不知名猶歎然

自以爲未足每對人言局促下寮惜不得遂行其志今所爲者未盡吾心中萬分之一其自責也甚周而其自期也甚大生彌月取玩金鑄忠字則期武穆九歲題詩則期任聖十八歲抱膝長嘯斗室中則期阿衡兼期臥龍二十五歲堅辭薦辟則期岩說至其任警廳時誓於衆曰必使一利無不興一害無不革一草一木無不具法治之精神一身一家無不受法律之保護凜凜數語與伊尹所思匹夫匹婦有不得其所若已推而納之溝中范文正先天下之憂而憂後天下之樂而樂者如出一轍惟其自期大故其自責周也推此志也雖與日月爭光而上躡武穆文正諸葛傳說伊尹之迹與之並策齊驅垂名字宇宙或更有進焉未可知也門人申權於是綜公三十年事蹟作年譜一卷皆紀實無溢美其友越州陳

詵復爲之序以壽之

戊戌上書記書後

戊戌政變黨錮案興遷騎四出禁會封報道路以目至不敢偶語  
舉世奄奄無生氣矣乃忽有人焉冒死發言大聲疾呼使人心爲  
之一震豈非豪傑之士哉金君梁滿洲瓜爾佳氏伏闕上萬言書  
言詞激烈指斥宮闈且直詆時相請殺之以謝天下萬口喧傳中  
外名人爭以一見顏色爲榮幸而當道取媚時相欲羅織下獄屈  
辱備至適時相亦瓜爾佳氏與君爲同族君兄方入覲謁時相時  
相竟嘆息謂之曰吾族有此才而不見用此亦宰相之責也願先  
約一面語傳事始解然君終不往見其後遂有常熟沈某請殺三  
凶之書世之論者往往並舉二人之名謂吾道不孤然君純乎忠

愛士也以視世之病狂中熟姑發危論以是爲標榜之具者而君超然遠矣吾初晤君於湖上見布衣草履風采隱然希文志在天下溫公脚踏實地處此濁亂吾願君危行冒孫留其有用之身以待時會世變方長不患無報國之時也湯壽潛

甲辰廷試策書後

甲辰春試借闈沐梁余得一旗卷文章樸雅才氣縱橫古誼忠肝時時見流露未易才也白山黑水孕育方新得此竦企無似亟起閱而薦之諸總裁深加贊許同攷傳觀擊節嘆誦有知者謂此必戊己間伏闕上萬言書名動一時世所稱滿洲瓜爾佳名金梁者也傍發果然共慶得人余差竣回京君來謁英秀剛峭以所著瓜爾佳氏忠孝合傳爲贊乃知忠義之裔節孝之後通德達人故非

尋常鄉里之士也及廷試君策對痛哭流涕按時立言不拘格式  
憶余戊戌廷對主憂臣辱據事直陳蒙恩拔置二甲第一今觀  
君策初聞已前列進呈私心欣喜幸衣鉢有傳人矣臚傳之日余  
先入見樞臣知竟以語多忌諱抑置三甲然外廷猶相傳爲高第  
也余驅車訪於旅館見賀者盈門高揭一甲三名之報衆方爭觀  
探花郎君夷然無喜色余告衆以傳誤皆鞅鞅而散君夷然無愠  
色余方慰勉之君起謝曰我家世受皇恩蒙賜出身方幸報  
國有日姑息時忌苟竊一命之榮此梁所恥願師有以教之余乃  
嘆君之器識宏遠迥異常流後來建樹正不可限量前之知君猶  
未盡也復索觀策稿見所陳說如尊王布德勵恥圖強正人心  
端士習科舉不可停經學不可廢及練旂兵嚴新軍防內亂禦外

患諸端言人所不能言忠義之氣溢於紙上滿洲多奇傑士天生此才必非無意敢不爲得人賀爰書於後而歸之李稷勳

東廳文牘序

光緒三十三年丁未三月尙書徐公調金侍御梁督辦京師外郊巡警郊外地極遼濶措治爲難悉心籌畫調查測繪分科並舉未月餘而大致定上之民部見者稱善嗣大學士那公兼民政任侍御主巡警東廳事謂才可大用深以是爲屈就侍御慨然而起不辭小試以興革爲已任其蒞任演說之詞有曰必使一利無不興一害無不革一草一木無不具法治之精神一身一家無不受法律之保護三月經營百廢俱舉成效卓著政迹爛然時比之張倅之治長安尤多去思或爲文以頌德政稱有十善一曰定法令二

日任賢才三曰倡自治四曰廣教育五曰善交涉六曰嚴督捕七  
曰重衛生八曰清戶口九曰正風俗十曰主公理蓋紀實也一日  
以公事偶與上官爭將不得直毅然起曰首可斷官司可罷公理必  
不可屈一時傳爲名言辭職竟去去任之日所部至有泣下者蓋  
爲政能得衆心樂賢下士士有一得之長獎借備至知人善任必  
使能盡其才尤愛士卒待如家人是以上下無不樂爲之用時肅  
邸視部事素禮重之乃調參議部務知無不言言無不盡法令章  
制多出手定嘗見其一日條議十數事力爭務使必行不決不退  
余既敬其釐直知可當大任而肅邸之能容人亦不可及焉當在  
廳任時政聲遠聞時人集其手諭文告編爲新政記刊印成書爭  
相傳閱乃見而謙讓未遑復取重編援胡文忠撫鄂文牘之例題

曰東廳文牘侍御德業日進名譽日隆海內數人才必首屈一指  
以爲舍此莫屬風采隱然爲天下望乃謙謙如不及嘗謂大臣維  
持全局我儕小臣唯盡補救彌縫之責人莫不稱其識量焉戊申  
春趙秉鈞拜書

奉天旗務彙編叙

奉天自改行省定官制始設司道各官其專辦旗務者曰旗務司  
合盛京各部司裁併而成者也從前盛京有戶禮兵刑工五  
部軍署有戶禮兵刑工五司自五部裁撤戶禮工三部事務改隸  
三陵戶禮工三殿檔房而軍署五司除刑司改隸提法司外遂  
併設旗務司先分五科以兵司馬政處改併軍衡科以戶司恩賞  
庫改併稽賦科以禮司牧羣司圍場處改併儀制科以工司改併

營造科以司務廳摺本房印務處號簿司改併庶務科又步營督捕兩司及前鋒虎槍兩營一併裁改而三陵衙門內務府宗室覺羅宗室營亦統歸旗務司兼管其所職掌實較各司道爲繁旋以變通旗制係屬暫局不必特設專司遂改設旗務處總司其事乃復重行釐訂改定名稱併設四科一曰總務科專管會稽統計機要及凡不列於各科等事而各科文牘遲速并歸稽核以便督催焉一曰吏稽科專管官兵俸餉升遷調補等事而全省旗制利弊并歸考察以備變通焉一曰禮學科專管 祭典 貢差 欽工及旗學等事而所司典禮得失并歸研究以議損益焉一曰界籍科專管旗籍戶口旗界地畝等事而各屬地畝虛實并歸調查以期整理焉查旗制變通事體重大前曾籌議辦法大略咨行京

師變通旗制處覈議本省以變通旗制定限八年關係憲政期限既不敢因循坐譟亦未便冒昧率行今唯擇其輕而易舉之事逐漸經營藉資補救支支節節而爲之毫無益於大局而見者不察或以輕舉爲譏或以持重相責實未知當事者之爲難也因取前後奏議案續擇要抄錄以備查考奏案均係已行之實事議案尙多籌議之空言遷旗練軍兵農並重工廠學校教養兼施力小任重事倍功半覽者庶幾鑒而諒之歟辛亥春金梁

附目

奉天變通旗制奏案

奉天變通旗制議案

奉天遷旗實邊報告書

三陵護衛軍訓練要言

奉天興錦遼營八旗工藝廠成績記

八旗滿蒙文學堂報告書

東三省遷旗實邊書序

今議變通旗制籌辦生計根本之策非從計口授田入手不可吾  
舅岳金公希侯主張遷旗實邊以爲滿蒙一帶地廣人稀內治邊  
防隱憂正切倘能急起經營爲邊蒙謀開闢并爲滿洲固根本非  
唯三省旗人生計無慮而京外駐防亦可藉此爲安置之地一舉  
三得事半功倍誠今日救國利民安旗籌邊之要著嘗議清理  
旗地籌款千萬期以實行主者以事體重大非可輕舉置之殊可  
惜也去歲承以變通旗制奏議奉天旗制變通案及試辦遷旗實

邊報告等書郵示碩畫鴻猷成效顯著乃知遷旗一策雖未大行於東省已得小試於白山計遷旗戶凡五百有餘口而來者踴躍報名至五千戶之多分期籌備條理秩然所謂大行則大效小行則小效者非耶公幼懷大志忠愛之誠出於天性曾三上萬言書甲午刺血戊戌伏闕辛丑迎鑾痛哭流涕指陳時事不少忌諱直聲震海內外甲辰捷南宮多適在都榜發羣爲國家慶得賢風采隱然係天下望宦京數載歷參新政聲名籍甚論當世人才者必首屈一指戊申之夏多奉命都護歸化城時綏遠將軍信欽帥勤方奏調公襄辦墾務擬約同行公慨然念故鄉以東邊事亟將仗劍出關辭不就遂赴滿洲先後佐徐菊帥錫清帥總理旗務興實業廣教育尤注重移殖事宜初苦無經費旗務又不司財政

一無憑藉乃通籌全局悉意鈎稽以一手一足之烈不及三年籌歛得百萬金以上以籌辦生計凡所建設未動公家一歛成績燦爛識者嘆爲奇才公猶以枝枝節節而爲之無補大局近方盛有所規畫蓋非大行其遷旗實邊主義以立百年久遠之基意不足也嗚呼其志遠矣多北門持節萬里橫戈定遠出塞之年德裕籌邊之日壯懷如昔未盡消磨功業久虛抑鬱誰語憶公賜和有句云壯懷班定遠獨立夕陽邊牧馬悲鳴邊聲四起深夜坐讀淚下泣然遂取遷旗報告書拉雜題此藉寄所懷不復達意願公之有以益我也宣統辛亥春蒙古三多書於庫倫節署

### 新畧交涉志要序

西疆交涉志吾友鍾聲叔所撰也聲叔性恢詭好留心外事嘗論

辦交涉當先刺得其隱庶操縱在我而發無不中不致爲人所持  
宦京數年鬱鬱不得志戊申之春忽聞以他人案犯嫌疑被緹下  
獄余救之無效遂定遺戌新疆非其罪也旣行其兄希洛同年追  
送之保陽歸述聲叔之言曰今意外得奇辱非恢復我名譽誓不  
生還並稱其弟在獄曾三次服毒竟不得死志可悲矣是年秋余  
亦出都作塞外客一處極東一處極西不通音問者幾三載今夏  
以會議八旗生計事赴京無意中詢知聲叔有新疆志之作亟函  
希洛索其稿乃先得此書凡六卷分訂約設領通商會讞傳教游  
歷爲六類溯其原始抉其竅要文約而事詳思深而慮遠尤注意  
於邊防國界慨乎言之在放斥不忘君處絕域不忘國余不敢以  
文人著述之例視之也急爲校而棄之夫今日中外交涉之大勢

唯俄患爲烈俄與我毘連朔漠地東瞰滿洲中侵蒙古西擴勢力  
於天山南北路陪都豐鎬之鄉蒙伊屏藩之地臥榻之旁容人  
鼾睡雖東挫於日西扼於英曾不少戢其南下之雄心余與聲叔  
遙遙隔萬里聲氣莫通要不出俄人勢力範圍之內冒之寒心而  
內地人士且茫然不知其所自瞠然不能言其故可不謂大惑耶  
不佞伏處海濱方擬輯東邊交涉志以記其略羈於塵鞅卒卒未  
遑今聲叔先我成書又焉能漠然不問一再循覽樂爲傳布一以  
表吾友三載著述之苦心一以資當國萬里籌邊之借鏡來日大  
難震來纚纚讀是篇益不覺歎息之彌襟也宣統辛亥五月金梁  
遼政紀畧序

金息侯先生今管葛之流識時俊傑也余督奉天軍務初兼巡按

使求賢才自輔鄉父老公推唯先生爲傑出余故久欽其爲人遂以政務屬之先生慨然有攬轡澄清之志投筆而起凡所籌畫以天下爲己任不規規於一隅手示行政大綱實救時要策余謹署之曰善作霖一武夫耳當於戎馬中馳驅自効內政唯先生是聽一年來地方平靖幸告無罪唯大局日惡知其不可爲而爲之尙復何益先生主統一三省守關待時余亦以遼東與關以內形勢不同內憂外患兼籌並顧不可輕舉及是時閒暇明其政刑修其器械未嘗非自保之策而先生方將發政施仁行反本之道以德服人使天下仕者皆欲立於朝耕者皆欲耕於野商賈皆欲藏於市行旅皆欲出於塗天下之欲疾其君者皆欲赴愬於前嗚呼吾惛不能進於是矣先生近錄其行政文牘彙爲一編題曰遼政紀

略置於余案請備檢查此亦臥龍之一鱗一爪也故不足盡先生  
然以是爲先生與我二人同心之紀念焉亦無不可遂爲叙其略  
而刊之丁巳春張作霖

### 奉天鄉土志叙例

周禮小史外史掌邦國四方之志土訓掌地圖誦訓掌方志歷代  
相因國史而外各有省志下至郡縣亦莫不皆有志詔地事知地  
俗中國之重圖志久矣奉天舊爲陪都王室所基比於古之南陽  
豐沛迄今三百年虞賓在位文物猶新盛京通志修於乾隆既嫌  
舊遠而縣志更付闕如典章沿革湮沒不傳非所宜也梁嘗攷古  
蹟徵今獻妄有奉天新志之議顧牽率人事卒卒未遑夫省志博  
大宜待通人而各縣鄉土志輕而易舉不妨自我作古爰不辭淺

陋發凡起例分門別類爲叙目三十二條頒發各縣尅日成編凡我同人斐然有作近稽新制遐輯故聞其事則信而有徵其文則純而不駁草創潤色彙俟將來分之爲各縣志鄉土合之即爲一省存文獻元和郡縣咸清臨安昔賢著述詳略互用但有合於史例斯無愧於作家後之君子何多讓焉金梁

### 黑龍江通志叙例

盛京通志自乾隆奉天爲主兼及吉黑光緒辛卯始修吉志記述有法讀者稱善唯黑龍江舊闕志乘文獻無徵實艱考證今擬纂修先爲發凡統分十類各繫子目序例圖說冠於編首餘文雜記綴於簡末原擬記載斷自辛亥國制既變史例宜然然壬癸後興革尤多改道設治今昔頓異盡付闕文亦非徵實凡所叙述遂

有詳畧隨時變通要豈得已擬名備志聊當長篇後之作者或有  
取焉

省以志稱國以史著其名雖異其實則同各省方志古今大事略而不載義有未盡吉志紀事實仿臨安提綱挈領全書要刪分代編年斯可取也今志大事分編上下一曰歷代二曰清代編年紀事史法所存大事志第一

范氏吳郡王氏姑蘇均首沿革知所當務輿地之說沿革不明山川人物無不誤矣黑省邊疆昔同荒服古今沿革殊渺攷據爰立專門用昭所重擬分二目以道爲綱曰沿革表曰沿革攷分條引證各加案語源流分合指掌庶明沿革志第二

方志所起本彷圖經要其本旨實惟輿地今擬志地分目爲五一

曰疆域詳誌郡邑邊要國界附表經緯二曰山川附表水道三曰建置分載城津官宇祠墓並考古蹟四曰氣候分記節令風雨寒暑各爲分表五曰風俗詳考禮俗氏族方言著其畧焉輿地志第三

班氏食貨後史相仍方志因之久成通例依類纂輯分目爲七一曰戶口附誌旗丁二曰田賦兼詳土貢三曰物產分動植礦四曰農墾農事墾務調查荒地詳載移民五曰工商附表輸出六曰礦務附表礦區七曰林業附表森林國計民生胥於此係生衆食寡不可忽焉食貨志第四

經制之政仿於六典各省方志取以爲篇今立此門分目爲六一曰官制附表職官行政司法并詳旗蒙二曰財政政費餉項錢法

征權并記鹽務三曰教育詳載學制四曰選舉舊則貢舉新則議員並詳自治五曰交涉訂約勘界通商傳教兼為記要六曰交通郵務電務鐵路航路並詳台站經制志第五

方志武備專誌兵防兵事要畧並宜詳載今所纂錄分目為二一曰軍制旗兵練軍防營陸軍水師江防二曰兵事征討藩屬防邊剿匪附表徵調武備志第六

龍江人物甄采殊難國史館傳八旗通志人以旗分地望無攷詳稽博訪類分五目一曰鄉賢統為列傳附注品目無當類纂二曰列女節烈同傳三曰名宦義取政畧類及鄉官不復別出政畧別出章氏所主致之志例實亦難安鄉賢多武不以將材而入武備文苑多文不以徵錄而入藝文名宦有傳合歸人物主客雖異詳畧無嫌

四曰游寓亦及流入五曰方外兼誌釋道徵文考獻務在傳信事

述無徵則附表焉人物志第七

實齋初議方志三書志掌而外別作文徵龍江邊省文化遲開搜集文藝寥寥可數彙輯成卷擬分三目一曰書目二曰文徵詩文章奏分類編錄三曰金石考古所資搜輯無多附著於此藝文志

第八

右凡八志目三十二前圖後記合爲十類雜記之體仿自記遺人地事物以類相次是曰志餘宜殿全志龍江故實盡於斯矣邇維黑省形勢遷革搜羅放失史氏之職吾亦舊史何心秉筆俯仰山川不勝今昔重感使君殷勤督責禮樂其興強爲縣最發凡起例敢侈著述補闕正繆以俟來哲

滿洲金梁擬

## 奉天古蹟攷序

東廬先生古君子人也好學深思從政之餘時有新著東廬叢刻二十餘種志傳而外多經世家言近輯奉天古蹟考聞聞見見足徵考古之勤先生以名進士官東省治民理財績稱吳公第一尙志節尤崇理學忠信篤敬雖蠻貊可行生平無聲色之好克己行仁聞過則喜識者稱其進德之猛今春應內務部之聘採取經史分忠孝節義四綱集爲務本篇上之內務教育兩部當議通飭中外宣講傳觀其有益於人心世道者可知奉天古蹟考雖不過隨筆雜記而其中如以通志人物不載伯夷叔齊爲無識獎守陵之老人辨薩滿之非宗教卓識精言獨見其巨詎尋常鈔竊成篇者所能同日語耶權不敏從遊門下逾十年先生每有著述

常以得附一言爲榮幸今遠別赴湘而此考適成又安可不妄贅數言以告讀者乙卯冬梁申權識

### 願學錄叙

願學錄四篇上篇首孔子聖之時者也次孟子鄭康成王文中子韓文公朱文公王文成公湯文正公中篇首伊尹聖之任者也次張留侯諸葛武侯陶桓公陸宣公韓魏公于忠肅公范文肅公下篇首伯夷聖之清者也次魯仲連郭有道陶靖節司空居士林和靖元遺山顧亭林附篇首柳下惠聖之和者也次老子東方曼倩王茂宏狄梁公韓蘄王趙文敏吳梅村夫聖則吾不能隘與不恭君子不由我將何所適從乎漢李固與黃瓊書曰不夷不惠可否之間此聖賢藏身之所珍也南史漁父之謫曰非夷非惠聊以忘

身古之人得志澤加於民不得志修身見於世窮則獨善其身達則兼善天下人知之亦囂囂人不知之亦囂囂我姑優遊於此中又何妨焉爰取孟子願學之義名其篇雖然君子處混濁之世降志辱身彌縫補救此中自有不得已之故草間苟活一錢不值豈真出於其願哉金梁

務本篇叙

歐陽文忠有言五代之亂極矣君不君臣不臣父不父子不子至於兄弟夫婦人倫之際無不大壞而天理幾乎其滅嗚呼何其言之可痛哉自古亂世多忠義之士疾風知勁草板蕩識忠臣而文忠爲五代史僅得全節之士三死事之臣十有五行之傳五人雖亂世崩離文字殘缺亦不能不怪當時可道者何少也乃至道

德淪亡風俗隳壞忠節之士絕迹於世而搢紳者流平居以禮教  
自任不知整飭徒諉過於氣運其可怪又何如耶雖然少何可怪  
卽舉世無一人焉亦何可怪獨怪當五代之世天下大亂戎夷交  
迫生民急於倒懸乃有憑道其人視喪君亡國亦未嘗以屑意方  
自號長樂老著書數百言陳已更事四姓及契丹所得階勳官爵  
以爲榮自謂孝於忠家於國安於當代老而自樂而當世之士亦  
共相稱歎仰爲元老歌功頌德者接蹤於門是眞文忠所謂不復  
知人間有羞恥事者矣今去五代之世遠矣當國者崇道德厲風  
俗方以忠孝節義數天下夫忠孝節義四者立人之大節而立國  
之大本也求之於今不可得不妨求之於古求之其人不可得不  
妨求之其言於是採取經史凡一行一言有可以爲法者按類節

錄輯爲是篇當獨處窮廬風雨如晦時出一讀不啻聚古今忠臣  
孝子節義之士晤曾一室十室之邑必有忠信如丘者焉天地閉  
賢人隱潔身自負之士嫉世遠去名堙滅而不稱者古來何可勝  
道又安和斯世遂無其人恨不起歐公於地下一讀吾忠孝之傳  
耳嗚呼吾烏敢侈言忠孝哉父死不葬母老遠遊不能朝夕躬奉  
養遭時艱難偷生苟活覲然以面目向人頑鄙無恥一至於此未  
知視無才無德癡頑老子何如此誠天地間一大罪人也又烏敢  
侈言忠孝哉此篇不足以示人姑作數言以誌吾過金梁自識

### 德量篇敍

梁性拙直自病褊急莫能容少年意氣盛視天下艱險不以措意  
客氣尙足勝之近則年未衰而志日薄居常鬱鬱頹然無復壯懷

憂能傷人意難自喻蓋吾病已深不可救也夫人之度量其相去  
詎不甚遠哉余友袁潔珊先生金鑑和雅有器度不妄舉動十年  
未嘗見其喜愠之色時月不見鄙吝復生而我府主張雨亭軍使

作霖剛斷有識遇變勿驚今夏道遇炸彈遠近危駭乃神色不動

從容易騎鎮定異常倉卒間兼顧治安嚴諭保民毋驚擾其從官  
湯旅長玉麟孫旅長烈臣持鎗夾衛馳騁烟霧中奮不顧身血濺

戰衣談笑乃自若此天生英雄識量超越又豈尋常人所能及耶

梁幕府伴食碌碌因人既不能矯情鎮物以幹濟於一時復不能  
浮沉取容幸求苟免又無學養事有不如意輒復撫膺而歎風雨  
鶴鳴常不克自制寡過未能聞道苦晚自顧病已深矣姑取德量

之篇以代藥石固知其不可救也老子有言良賈深藏若虛君子

盛德容貌若愚去子之驕氣與多欲態色與淫志是皆無益於子之身嗚呼有味哉有味哉金梁自識

### 德量篇序

德量篇息侯先生手輯謂以自治褊急之病蓋謙辭也先生少有逸羣之量持躬處世一以忠恕爲訓戊戌庚子之交餘杭章太炎大會名士於海上以政見不合極斥言先生謂將擬以手刃先生笑而徐引明道對荊公之言曰天下非一家私事願平心靜氣論之太炎感服卒交好如初此豈褊急者所能爲耶時黨禍方張先生伏闕再上萬言書以伸忠直衆慮禍及勸走匿先生毅然不爲動閩縣林琴南贈以序言亟稱其膽識非學養有素識量過人又焉得此昔爲京師警察廳監事最繁劇先生身兼八職不廢詩酒

現任政務他人處此夙夜不遑而先生整暇如無事嘗集聯句懸  
於座右曰澹泊明志寧靜致遠集思廣益開誠布公嗚呼先生之  
志量遠矣先生爲政能得衆心樂賢下士士有一得之長獎借備  
至知人善任必使各盡其才宦遊京外十數年德業日進名譽日  
隆風采隱然爲天下望猶歛焉自以爲不及近尤深自歛抑彌弱  
如畏常有以自下自謂不學無術幸主帥英斷幕府多才得容藏  
拙遇事唯補救彌縫委曲以求其全而已豈有裨於大局哉何其  
辭之謙也權方自湘來寄食門下先生出此篇相示取材經史與  
去年所刊務本篇畧同而精切過之此有益身心之作也人生不  
能無拂逆偶讀一過平時忿懥不覺釋然於是見先生德量深遠  
克己之功爲尤不可及云梁申權謹識

## 瓜圃詩草叙

吾父七歲能詩善書畫書無不讀壯從李文忠殺賊江南功成不受隱居以吟咏自娛小子日侍膝下牙牙學語亦七歲能詩十年積稿盈寸見世之名士詩人無不有詩一卷於是鄭重繕正將付梨棗妄思自列於作者之林吾父摩小子之頸而詔之曰老夫年七十成詩數萬首不敢示人爾十餘齡童子耳乃自刻詩草何其智耶無論詩不佳徒供人指笑卽佳矣爾方當潛求實學何可舍本逐末小子再拜謹受教自是不爲詩者十餘載中年以後感懷身世時有所觸不覺形之篇什梁生廷揚曾爲代刊詩草老友英歛之見而謂吾曰與君十年如水之交日讀經世文章乃不知能詩也夫小子烏足以會能詩詩以言志歌以言情可喻之已

而不可喻之人二三知已空山酬唱偶有所得相視而笑未嘗非人生一樂若欲以是沽名釣譽爲標榜之具又豈詩人之所應爲者哉梁生不諒一再相強乃復爲刊是本嗚呼吾父棄世近十年矣今冬始營葬於杭州之龍井風雨墓門人天永隔追思庭訓痛哭失聲吾詩徒足供人指笑耳辱身忘新罪大惡極從此將永戒爲詩乙卯歲暮金梁自識

附東廬吟草序

東廬吟草皆先生戊申秋出關後之作也先生爲詩感時傷事嘗惓惓於忠愛不好爲吟風弄月之詞余尤愛其秋思句云朔風驚塞北秋雨憶江南客夜云寒烟和月白疎柳壓燈青錦川道中云夕陽孤塔影秋月故鄉情飄逸悲壯雅有古意而先生

以爲徒懷風月不足誦也其志遠矣申權謹書

附壬子記遊草叙

人生七十古來稀哀樂中年忽焉過半悲日月之遂往悼吾年之不留感懷身世俯仰自哀率爾賦詩不足稱述余今年三十五矣髮白數莖齒搖搖已落其二意氣頽然如老人而見者猶謂我少壯亂離之餘家破人散海濱鬱鬱不得不出走四方塵俗之狀彌復笑人先生有無家之嘆大夫爲卜居之文亦可慨已昔晉陶處士詩有曰少無適俗韻性本愛丘山誤落塵網中一去三十年悲夫實迷途其未遠覺今是而昨非歸去來兮今而後庶知免夫壬子歲暮息侯金梁自叙

讀壬子自述詩如讀先生年譜也先生博學善屬文偶亦爲詩

妙語天成不事修飾昭明序陶淵明集曰語時事則指而可想論懷抱則曠而且真唯先生得之出關以後鬱鬱不自聊寄情吟咏前後刊有東廬吟草壬子記遊草等篇先生自弗善其詩以爲學力不及雖然視今所謂詩人之詩唯沾沾於字句間者蓋亦遠矣權曩爲先生訂年譜詳述言行稱其能詩並請刊行先生勿許也今觀自述詩不啻先生之自訂其年譜乃亟爲注而刊之以示同人當亦識先生者所共許歟梁申權謹識

瓜圃藏書記甲編叙

吾家藏書凡數聚數散先祖父所藏得自蜀中頗多善本道光壬寅咸豐辛酉兩遭兵燹先父所藏皆江浙故家亂後餘燼亦有文瀾閣本辛亥之變盡歸散失予出遊京奉續有搜集及南歸

以携帶不易奉人士請留吾書特闢安東圖書館藏之蓋未百年已三聚三散矣自予再來京適修黑龍江通志所需圖書隨用隨置以地志爲多此外不論版本見有名人批校其佳者往往留之所積漸增即是編所記也此中以舊藏傅氏父子批校漢書爲最丙辰年余姪熊賢方宦晉兩報見傅青主批十七史唯闕史漢二書索三千金予急電囑代收渠同年本翹知而爭曰此有鄉賢手蹟楚弓楚得不允歸人且欲巧取漢書以去予以舊藏亦不允歸人也渠同年今去世不識十七史已歸何人物無常聚不勝慨然吾常謂圖書身外物耳隨聚隨散不妨達觀然旣留吾篋如佳客偶過亦不妨暫題姓里以爲別後相思之資若以辛苦積聚必欲刻示子孫守之毋失毋乃愚歟瓜圃老人金梁

瓜圃藏畫記甲編叙

先父嗜古好金石藏玉尤夥圭璧璽章續二千餘事書畫不多藏嘗自解曰書畫舊者不過百年金石多三代以上物唯玉爲古禹會塗山執玉帛者萬國禮記君子比德於玉說文玉有五德蓋玉性善變有生趣佩之吾身朝夕摩挲日受精氣久且與吾合同而化可不愛乎梁幼年聆此以爲戲言其中實有至理也辛亥遇亂金石書畫盡損唯藏玉自吾父去世久置樓頂數盜入取篋重竟同墜下傷一人皆逸去幸而未失手澤所存或有神靈擁護之歟先父精鑒賞所藏書畫皆取忠孝遺蹟尤重列朝宸翰常敬謹尊藏梁亦多藏御筆見必寶之太祖之手勅太宗之盟疏世祖之畫佛聖祖之遺詔凡列祖列宗十三朝書

畫皆備後得內閣大庫檔案內有株諭硃批等類尤爲難得遂集爲瓜圃藏畫記先輯甲編專列宸翰一類逐件詳記以備查檢後得列聖御璽十數方附注於末又先祖父先父皆善書能畫遺墨數幀亦並載焉此當藏之家廟傳之後世不得視同尋常書畫凡我子子孫孫其永寶之瓜圃老人金梁

### 瓜爾佳氏九忠四節三孝圖跋

梁既輯瓜爾佳節孝忠義合傳復繪九忠四節三孝圖擬彙印徵文以光家乘我瓜爾佳氏族最繁盛世傳忠孝茲所輯僅南遷後杭州乍浦本支皆入祀忠烈及請旌節孝者也今恭述於左

### 瓜爾佳九忠圖

高高祖信勇公諱烏巴海

京口副都統卒於軍靈隱白蟻橋謚立祠墓在杭州

瓜

圃叢刊叙錄

曾伯祖威毅公

諱

舒通阿

漢

墓在

乍浦

軍都

統

殉節

土

福

賜

謚

立

祠

伯祖

諱

觀續

咸

豐

庚

申

入

祀

昭

忠

祠

亡

葬

忠

義

塚

奉

世

職

塚

奉

高曾祖母文太夫人

率

高

曾

祖

父

諱

通

阿

基

罕

泰

早

故

欽

旌

節

孝

撫

曾

祖

母

邵

太

夫

人

孤

與

曾

祖

父

諱

查

郎

阿

繼

娶

人生

輩

杭

公

苦

節

孝

撫

瓜爾佳四節圖

叔父

諱

鼎瑞

葬

乍浦

忠

義

塚

奉

義

塚

死

投

池

死

墓

祖

墓

死

於

賊

被

害

賜

忠

義

塚

奉

義

塚

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

墓

祖

墓

死

投

池

死

&lt;

嗣祖母王依太夫人

苦節嗣祖父諱圖幹恰納早故迎姑撫叔

從嫂邢夫人

從兄松梁早故欽旌節孝節

### 瓜爾佳三孝圖

先祖父葦杭公諱觀成

官民爲立生祠葉官歸孝事稱至孝

先姊織雲女史畫梁

時以先妣病割股進入宮供奉辭之父愈竟死

亡弟文梁

天性奇孝先效剖心療太夫人病死

右爲我瓜爾佳氏九忠四節三孝國史方志分別有傳畧

父桐山公自忠節陣亡誓死報國復出從李文忠公殺賊江南

以克復太倉州首功賞戴花翎贈將軍頗著戰績文忠稱爲非常

人知非常題節孝傳詩曰江南有奇才殺賊誓以死功遂忽辭歸而能見及此莫撫萃一人子再造矢真誠天竟延其壽常忠孝興節義中

一千秋不  
垂青史

亂平後隱居不仕自號瓦全生嘗嘆曰恨不馬革裹

戶報 國之心與忠節公正同也又吾胞姪熊文辛亥之變禦亂  
兵刃加於頸刺傷足卒未殊亦以非死王事不及附入又佐領哈

楚顯辛亥被害亦吾瓜爾佳氏以非本支不列蓋同族之以忠孝

著而湮沒不彰者多矣去歲家文直公

伊克坦

言西安駐防多同

族辛亥殉難者無數亦思輯瓜爾佳忠義錄以表忠烈文直久值

毓慶宮爲 帝師傅孤忠自矢惜未幾遂薨不識忠義錄有遺稿

否 梁此編文直曾允爲撰序文竟不克踐言吾滿寥落同族彫零

言念及此不覺淚潛然不止也金梁謹書

案我瓜爾佳氏爲艮白舊族自順治二年烏巴海公奉 命

調駐杭州雍正七年曾祖查琅阿公調駐乍浦至同治三年

先父調歸杭州三百年先後三遷傳至今凡九世小兒關東復籍長白自然祖塋仍在杭乍兩地也今擬建立家祠甲子年又適逢先父桐山公百歲冥壽之期爰繪是圖徵文當世倘蒙錫以詩歌聯額立言不朽有斐君子終不可諱竊爲諸公詠之

省三詩叙

吾胞姪省三名熊文杭州府學附生少有大志嘗言滿洲發祥地當如清初制自成一國不當改行省失根本聞者皆驚爲創論宣統初爲浙江省議員遇事主公道紳耆交推重之辛亥後侍其父東來奔走蒙邊頗有規畫鬱鬱不得志竟以憂死檢遺麓僅得詩稿一紙題曰哀貴林有小序曰辛亥秋浙撫署衛隊通敵譁變架

巨礮吳山頂轟旗營吾力主戰結敢死軍將開營延敵直抵山刦

其礮免生靈塗炭將軍德濟納協領貴林議主和林出周旋與之

訂繳械發餉保安謀生四約合營力爭不能止衆擲槍於地大哭

散有歸自縊者

八旬老叟迎喜等

有投水死者

世職雲騎尉文榮公等

且有出擊被

戕者

武林門額特精額等防禦

約既定變兵入營大搜掠營中人羣起責林林

乃率佐領哈楚顯舉人存炳至所謂軍政府申前約竟同遭槍決  
並決林子量海林求一面督兵者不可得終至不能全軀保位且

喪其子哀哉詩曰八千子弟誓同仇棄戰言和孰與謀山重毛輕

爭一刻父忠子孝幸千秋全軀保位應羞死取義成仁詎強求天

道而今真可信惠興文學巍然留原注曰十年前惠興女士毀家

興學力竭求林助不應遂殉學死時家叔父在京奏請旌表並開

會追悼募捐助之電召林挾欵歸重興女校今亂後營制盡廢唯  
惠興女學巍然獨存此皆省三詩中語也余以所言有關信史時  
方刊貴和堂三代詩存泣然爲錄附於後吾兄康侯椿梁一生忠  
恕居官以亢直得禍暮年喪子老淚縱橫讀此詩當知省三自有  
不死者在幸善自寬慰勿過哀悼也叔父金梁泣誌

重印瓜圃叢刊叙錄初編跋

是編初刊于癸亥歲久已無存及門王君德溥旣代刻續編又索此重印以應求者實不足觀也王君政學兼優曾長塞北司法有應變才倘假以百里定能爲地方造福近司榷蓋平未兼旬而稅入倍增亦可喜也余避地東來諸公念舊適館贈金解衣堆食王君復再爲刊書遼人好義夙尚風節東方有君子之國其在是耶余方修通志擬於人物增節義一門以今徵古知可傳者必不少他日彙輯成編當別出遼東節義傳並行于世又可爲我叢刊增一奇籍合之新輯四庫全書校印記博物館陳列品目冊三編之續計日可成更將以刊資累人矣一笑戊辰歲暮息侯金梁識于



瓜圃叢刊敘錄續編總目

宮史錄要跋

金梁

重拓散氏盤跋

金梁

內庫吉金抄目跋

金梁

德宗御製詩文稿跋

金梁

崇謨舊檔跋

趙爾巽

黑龍江通志綱要叙

金梁

黑龍江大事志叙

金梁

黑龍江沿革志敍

金梁

黑龍江疆域志敍

金梁

黑龍江山川志敍

金梁

瓜圃叢刊敘錄續編

總目

黑龍江人物志敍

金梁

黑龍江金石志敍

金梁

東三省古蹟遺聞敍

金梁

金少保甲子奏疏書後

英華

清宮遇變記

英華

王忠慤哀輓錄書後

金梁

古籀答問書後

柯劭忞

清史太祖本紀贊

金梁

清史聖祖本紀贊

金梁

清史世宗本紀贊

金梁

清史宣統本紀贊

金梁

清史天文志序

金梁

清史兵志序

金梁

清史藝文志序

改

金梁

清史文苑傳序

金梁

清史遺逸傳序

金梁

清史張勳康有爲列傳論

金梁

清史稿校刻記

金梁

建州表敍

金梁

后妃傳稿書後

金梁

國史忠義傳目敍

金梁

清史例案敍

金梁

瓜圃叢刊叙錄續編

總目

家父初輯瓜圃叢刊三十餘種先爲敍錄刻于癸亥冬今自甲子至今復輯續編又得三十餘種家父立德立言中外共仰碑傳序跋求者日盛積稿盈尺方擬另編文集此特叢刊敍錄一類而已清史通志別有全書世傳讀之今所擇刻數種皆

家父手稿惟史傳撰補過多不及盡錄當俟他日重輯單行也

戊辰冬男闢東謹識

宮史錄要跋

金梁

國朝宮史三十六卷分列六門曰訓諭曰典禮曰宮殿曰經費曰官制曰書籍乾隆七年編二十六年復輯至嘉慶十一年又續編一百卷體例與前編同均繕寫本藏內府備御覽外廷不能見也有清一代家法最嚴起居出入皆有定則毋得踰越列朝訓諭諄諱告誡惟恐失之爲歷代所未逮道咸以後朝政或有更新而宮規一仍舊貫及慈禧皇太后聽政既久偶事遊宴常駐別苑舊制乃稍稍廢矣聞太后嘗欲自選宮監內務府大臣榮祿以非祖制執宮中則例以爭太后無以難之乃以私窺祕檻爲言竟斥之退實則內廷諸臣例得預聞非其罪也梁奉命入直特請頒發是書同列傳觀藉爲法戒並按類摘抄以便檢閱名曰宮史錄要宮史

向貯懋勤殿梁文忠公曾擬錄副刊行前編方竣而公遽薨不及付刻梁頗思繼錄續編並集嘉道以至光宣關於宮闈故事重補宮史合刊全書庶足備一朝宮廷之典制歟甲子三月金梁識于內務府直廬

重拓散氏盤跋

金梁

散氏盤自貢入天府初陳列養心殿不知何時棄置內庫外傳遺亡久矣今春正月梁入直奉命清理始得于庫藏塵土中衆皆指爲仿造之品及檢出捧觀則赫然真器至寶也盤高六寸五分口徑尺有七寸四分深三寸重六百八兩銘三百五十餘字有兩耳制作古茂中貯小冊爲趙秉冲釋文宮錦爲囊猶舊裝也乃先請攝影全形並選工精拓分頒內直諸臣與諸攷古家及北京大學

校博物館圖書館等處得者寶之惜當時未及多拓以廣流傳耳

是般入貢始末初傳阮文達

元

所進近吳綱齋士鑑攷定爲嘉慶

十四年萬壽節阿敬敏

林保

進呈與張叔末清儀閣題跋所記

使某貢入之語年地皆符所云

嵯

使某者是年阿敬敏由閩督調

任兩江殆當日貢品有由兩淮運使采辦者遂爾誤傳至積古齋

鐘鼎欵識云般初藏揚州徐氏後歸洪氏不言貢進者其書成于

嘉慶九年在事前也是器銘文釋者多家率支離不足據近惟王

靜安國維攷釋獨精所釋地名既確有根據而作器時代亦推究

甚詳曾爲梁題于賜本洋洋三千餘言海內外識者傳抄殆遍矣

是年既拓散般復擬各殿陳設鐘鼎及庫藏古器盡請拓傳先派

員清檢首于養心殿中見鼎一高三尺中有文甚精蓋而且丁鼎

也其可寶更在周般之上矣今般已移御園絳雪軒而鼎仍陳列殿上巍然獨存梁嘗偶篆一聯云故宮舊寶且丁鼎大內新傳散氏般見者不勝今昔之感焉甲子歲暮金梁

大內庫藏吉金目錄跋

金梁

大內庫藏以書畫磁玉爲多鐘鼎彝器寥寥可數初皆陳設殿閣慈禧臨朝喜新厭古漸易泰東西製品遂盡棄諸內庫梁奉命入直清檢藏珍分東西二庫排日按查照冊對號仍還舊庫奉行故事而已梁旣創皇室博物院之議先期籌備遂請分類檢查隨時陳列首及鐘鼎而簿錄向歸內監收掌嚴飭獻抄僅得三數百器責問主者則云年來執政時有提借內府欵紳偶亦典售大婚時某公召商估賣自留十器專家評鑑皆奇寶也梁乃復請派員即

按抄目逐器審查多有未見著錄之品商且丁鼎實爲第一初擬  
援散盤例監工精拓再續西清未及行而遇移宮之變故舊散逐  
不忍復問其事矣是編所列皆錄舊冊其名與器不盡相符且多  
俗字奄寺焉知攷古當俟博物君子重爲釐訂耳憶昔見盛京大  
內所藏鐘鼎西清續鑑摹繪雖精亦不能盡合嘗建議重拓或用  
攝影後移歸古物陳列所聞正攷訂傳拓將來能合是編一一鑑  
定以廣流傳庶爲攷古者所樂觀歟滿洲金梁

德宗景皇帝御製詩文稿本跋

金梁

德宗景皇帝御製詩文集久未編印梁屢請諸朝朱艾卿師益藩  
朱聘三同年汝珍承命恭編而德宗詩文收拾無人已多散失梁  
嘗赴醇邸議事適見書厨藏有德宗御筆稿本驚喜之餘亟請捧

歸補其缺漏遂成完帙擬即刊行同列者害之星夜追還必不允  
刻不得已敬繳原稿耿耿此心至今不能釋然也幸御筆墨蹟當  
時留有攝影徐菊人師晚晴簃詩選列代御詩適闕德宗即以是  
稿選補而時移世易御製全集之刊益無望矣德宗生而好學天  
資明敏及親裁大政發奮思有所為以圖救國乃上扼于聖母下  
阻于權臣卒不得少行其志怫鬱摧傷奄致殂落甚至數十年以  
後殘稿遺墨亦復爲宵小所弄不使流傳天之厄帝一至斯乎嗚  
呼惜已賜進士出身少保總管內務府大臣金梁恭跋

崇謨舊檔跋

趙爾巽

盛京大內崇謨閣藏有舊檔二種一爲滿文百數十冊所載皆太  
祖太宗朝事編年分紀金息侯總管輯譯成書世傳滿洲老檔是

也一爲漢文六冊分載勅諭奏疏及朝鮮國書皆天聰崇德年事  
息侯錄副編次名曰崇謨舊檔即是編也息侯留心掌故抱殘守  
闕嘗輯刻國故零刊十數種名爲瓜圃叢刊自撰叙錄流傳海內  
外無不重之是編所錄奏疏皆開國儒臣密籌帷帳有署書房秀  
才者即後來上書房南書房所自本想見草創規模之簡略焉羅  
叔言參事刊大庫史料曾取以編入與他種同託爲庫書其實非  
也蓋即崇謨舊藏耳崇謨兩檔久爲各國所重視日本早攝照爲  
圖俄德學者亦時訪息侯研討滿檔並借影其副本以去而邦人  
知者轉稀惜滿文老檔冊帙過多未易付印是編當早刊行既免  
散失且補國史所不及幸息侯速起圖之允補老人趙爾巽

黑龍江通志綱要叙

金梁

余久遊滿洲嘗屢過山海關望長城遺蹟東至長白登龍岡遷旗設治勒碑天池之側又嘗巡邊至洮遼渡洮爾河驅馬經興安嶺之下思北上直登外興安嶺絕頂觀有清盛時疆土舊界三百年山河如故而今昔已非時適聞京師有奪門之變倉卒遂歸至今東望金山猶悵想不能已也東三省滿洲故土一山一水幾皆爲我馬蹄所及奉天吉林黑龍江昆連更有甌脫地焉爲喀拉沁達爾罕諸蒙古遊牧地余嘗商之諸王公慨允供我開墾移民殖邊先設行省期以十年盡開蒙荒然後推及外蒙諸旗以至西比利亞盡供我拓殖之用張雨亭將軍作霖頗贊其說而軍務倥偬終未暇遑行余甚惜之黑山孫占堯督帥烈臣吾昔嘗稱與張將軍並爲英雄人者也庚申督黑龍江思有所建樹遠約籌邊余故與

有同官之雅遂起應其聘適占帥督隊乘車躬迎至長春秉燭夜談畧多規畫復同車至京師殷勤訪問知我不能遠遊臨別乃以黑龍江通志相屬此吾願也余前長奉政以盛京通志猶乾隆年修擬續編新志曾通令各屬先輯鄉土志並別多徵錄備編纂又以吉林通志光緒年修體例頗善亦畧有補輯惟黑龍江舊無通志即外紀紀畧亦寥寥僅數書東北地理古無攷究之人遂發奮思補其闕五載搜羅先集志料作長編得稿三五百萬言裝百五十冊差足自豪書成而占帥去年已以勞卒余千里哭臨竟不及觀矣亦可傷哉今春程守初廳長廷恒來京以吳興權督帥俊陞于振甫省長駢興之命督促交書乃期以一月補輯繕正全書脫稿題曰黑龍江備志不敢稱通志也又以全書卷帙過多復錄其

綱要爲二卷先行付刊以供校閱昔司馬溫公作資治通鑑別撮新書精要之語以爲目錄溫公志在春秋余則但爲取便觀者而已余別滿洲久矣自山黑水徒勞夢想而龍江故實日事編摩尤念念不能忘今聞中俄方開會議黑龍江與俄連界萬里倘得重理前約還我舊疆山河無恙幸復有清開國之盛豈非一時快事哉則吾此書沿革疆域常包舊界而併述寧受體例不嚴之誚此物此志或其先徵亦庶幾告無罪於天下也乙丑初夏滿洲金梁

黑龍江大事志叙

金梁

國有史省有志志地志事其例一也乃各省舊志偏重輿地而一省大事往往闕焉未詳雖謝啓昆廣西通志李桂林吉林通志各輯大事冠於首然一則止於明代一則僅載清初蓋當時有所顧

忌猶不能獨盡其職也余修黑龍江通志特先撰大事志徵集志料分年編錄積高三尺許凡各類材料盡彙於一編然後撮其大事爲專志而分門別類再散而爲各志提綱挈領可分可合庶幾全志成爲一氣焉初聞錢塘連慕秦文淵前掌志局輯有建置志

頗詳於歷代大事遂往訪之慕秦捧手稿出見而自指其顱曰文滋爲此稿頭白矣數載纂修至忘寢食願有以教之余乃假歸錄副刪繁就簡成歷代大事志二卷頗采其說又別成清代大事志四卷合成是稿而慕秦已以憔悴客死余又何忍沒其勞而不爲之表揚也慕秦亦主修志必先大事謂一省之有志猶一國之有史大事志者即一省編年之史也與吾意正合余旣爲草小傳附於流寓而復述其畧於此讀吾書者先觀大事再及其餘自唐虞

三代以至有清龍江一省四千年來古今史事略盡於斯矣滿洲

金梁

黑龍江沿革志叙

金梁

大事志詳於事沿革志詳於地二者蓋互相爲發明也龍江地志古無專書古今沿革殊不易攷其散見於史志者山川人物又多用譯名往往一名數變音義各異一黑龍江也而有十五異名一松花江也而有十九異名洮兒河克魯倫河異名皆至二十有三其餘少亦二三異名而有時又有地異而名同者尤易淆亂如金元史松花江亦稱黑龍江魏書松花嫩江同稱那河或隨地異或隨時異而所指道里方向又多有牴牾攷古至此其術窮矣余攷沿革先列今名而以史志異名詳註於下列爲一表然後山川部

族名從主人敘述始有準則及調閱志局存檔乃見有沿革志舊稿後附譯名表以今徵古以同攷異一覽了然實出蜀中史子廉

錫永

之手亟訪其人蓋博識好古之士於龍江沿革原原本本益

我良多凡夙所蓄疑於中而不能決者一旦爲之豁然焉於是就

其原稿復自編次成沿革志五卷沿革表一冊與大事志合刊實

同爲全志綱領惜不知子廉近遊何所不能得一言以相攷訂爲

悵悵耳又江寧吳向之先生廷燮撰有奉天吉林黑龍江沿革表

攷證精確數從請益其言金史兵志烏古里石蠻迪烈等九部族  
節度使當在奉天洮南醴泉以北黑龍江大賚肇州以南略有異  
同是志適已付刊不及削正特誌於此以備參攷其獲益者父豈

梁一人已耶滿洲金梁

黑龍江彊域志叙

金梁

沿革志古彊域志今二者雖分實當合爲一志也清初黑龍江省東至海五千里南至松花江八百里西至喀爾喀一千八百里西北至尼布楚二千里北踰外興安嶺三千五百里其彊域蓋至廣自尼璣兩約讓地畫江遂至鑿如今界山川不易而形勢已再變矣余修通志凡關於述古者仍用舊彊唯關於記今者始限今界昔胡文忠公繪刻輿圖一遵大清一統志不失尺寸其用意深遠故爲有識者所共喻也今志彊域實以行政區域爲本分道分縣各述大綱唯黑省轄境遼闊未置縣局者尙多雖沿邊一帶先後設治均有專官而內地仍多荒廢往往數百里渺無人烟又有索倫鄂倫春諸族閉居林谷至今不與人接語言習俗迥異常人尤

官治教令所莫逮道里界至自不能詳唯有誌畧以待查而已唯  
國界邊要詳記之毋敢忽慨昔有清初起征東海平羅刹兵力所  
及使大使鹿諸部莫不威服實兼擁有西伯利亞之東半部今俄  
屬東三州皆滿洲舊壤昔也日辟國百里今也日蹙國百里於乎  
哀哉維今之人不尙有舊追述至此撫今思昔能無感慨係之耶

滿洲金梁

黑龍江山川志叙

金梁

黑龍江山川志崇仁黃君維翰所著余修省志調取局存舊稿唯  
見是志獨完善亟取其稿實吾書而趨訪於客邸則安靜無華謙  
謙君子蓋台文學循吏爲一人者也君昔官兵部光宣之際出守  
龍江呼蘭兩郡嚴而不煩政聲卓著撰有呼蘭府志敘述有法不

愧史才江省郡縣之有志實自君始今是志以屠氏圖說爲本其餘圖志及冊檣皆有證引蒐討采摭治爲一爐良工苦心其慘淡經營之迹猶可想見非苟作也其間畧有點竄則以則合全志體例成一家言耳余初定志例山川一志當防水經並先爲山脈水道合撰圖表山以內外興安嶺庫穆爾山興安嶺伊勒呼里山布倫山爲綱而分列各支脈於下水以黑龍江額爾古納河嫩江松花江爲綱而分列各支流於下復聯山脈水道綜合而互注之支幹源流分合遠近一覽了然是志山川分述先記全省次道次縣以幹分支以流溯源較之圖表尤詳且盡志內有云黑龍江天然形勝一山一水曲折平衍皆成半環式爲地理上一奇觀今讀君志十餘萬言前後呼應如一氣文境迴環何其相似耶君之政績

當列名宦茲述其畧於此文學術吏台爲一傳庶幾爲吾山水增色焉滿洲金梁

黑龍江人物志叙

金梁

黑龍江人物自帝堯以來歷漢魏晉唐皆有傳人至遼金元而極盛有清一代亦多名賢此皆龍江史乘之光也今志人物畧分五類一鄉賢以帝堯時之始均爲首始均黃帝子昌意少子之裔也而淳維爲匈奴始祖冒頓置諸左方王將實接今黑龍江境郝且爲烏桓大人東接今黑龍江西境又遼金初起皆在黑龍江境其始祖創業與各部長正同皆不可不誌又明設各衛所指揮同知千戶等皆以部長任之此亦鄉之先也並當附傳今自帝堯至有清共傳約六百餘人一列女列女見於史傳者少今有傳者如唐

之李謹行妻劉氏金之阿林妻薩勒等及清代諸節孝僅數十餘人而以歷年旌表節孝者統列其姓氏增于後一名將凡非省籍而著戰績於境內者皆爲立傳戰國有趙開漢有徐自爲唐有薛泰劉仁軌遼金元戰績尤多元之十九功臣八十八功臣皆名將而明永樂年北征諸將清初征羅刹諸將皆戰功著於黑龍江共傳二百數十人一名宦古多不傳今自漢蔡形魏李敞以來所傳僅逾百人而清代旗籍多有服官本土者又將軍兼理民事故所傳與鄉賢名將不嫌互見一流寓宋有洪皓金有高麗醫者元有陳韶孫而清以來尤著如蔡毓榮李鍇方登輝父子劉鳳誥英和等皆有著述歌詠風物餘亦各有可傳今共傳三十餘人知遺沒者衆矣凡上所傳列女而外合約千人較黑水先民傳實已倍之

然漏畧仍多盛京通志選舉志所載女真諸氏隸今黑龍江境者四十人皆有名之士余爲黑志表職官其有政績而事實無攷者亦不少又蒙旗世宦文獻不足亦付闕如皆不能詳也而各縣冊報紳耆爲數尤夥一鄉之士當登縣志國史載天下之士省志載一國之士體例不同更無論矣金梁

黑龍江金石志叙

金梁

黑龍江省金石文字之可攷者有得勝陀紀功碑出肇州沙土中爲金代金石又奴兒干永甯寺碑及重建永甯寺碑爲明代所立今皆淪失案魏書烏洛侯其國西北有魏先帝舊石墟室太武帝遣中書侍郎李敞告祭刻祝文石室之北而還實爲黑龍江石刻見於史傳之始惜今已無可攷又康熙初墨爾根地方掘井得石

文曰莫來耕繫唐年號此外惟遼金官印及唐宋古錢數物猶存其餘殘滅者何限乃至康熙二十八年分界碑亦復爲人遷移可嘆甚矣近聞大賚新出土有遼匡義軍印當攷查保存並爲補入志中黑省東封古多爭戰實爲漢唐來兵力所及余嘗巡邊至洮南過突泉縣倚興安聞嶺有殘石刻漢隸大將軍字樣意必衛青出塞偏師所及留此殘蹟而漢使徐自爲築城鄣列亭至盧朐尤爲漢時兵力已及黑境之証紀功勒石豈遂無人迨至遼金元文事武功後先繼盛遺蹟流傳亦多古物余修省志文獻莫徵而金石一類尤寥寥無幾安得好古之士隨處留心采訪徵集續輯成編庶足爲攷古者之一助歟金梁

東三省爲古肅慎文化夙啓實在三代以上乃所見古蹟如毋丘  
儉紀功殘石好大王摩崖墓碑皆出三國魏晉以下亦寥寥僅數  
種知古蹟湮滅者多矣吾昔北巡洮突聞有漢大將軍殘石惜已  
無存土人出示鐵矢鏃深陷枯顱顱大如斗而鏃大如掌其人生  
時當大遼尋丈肅慎善矢意其苗裔耶及出法庫邊門有山洞鑿  
圓石爲戶能自啓闔曾有人入視謂如是者達十三層尙未盡忽  
見石龍鱗甲聳然自動大驚奔出後無敢入者又見石榔長丈餘  
謂原有尸骨一足長及人肩吾笑謂此可合突泉之顱爲一人使  
跨石龍飛去吾見其顱於彼而見其足於此相去千餘里此真巨  
無霸矣聞者皆大笑吾北遊三省近二十年所見聞至多怪誕惜  
未得盡記錄近盛京時報徵求古蹟輯爲一編並采及拙錄盛京

古迹攷吾昔所錄多半摘抄通志實不足觀今讀是書古迹遺聞  
聞所未聞見所未見恍如遼鶴一去千年城郭猶是而人物全非  
撫今思昔歎歎太息其能自己耶編者函索叙言率書昔所見聞  
以塞責擲筆惘然滿洲金梁

金少保甲子奏疏書後

英華

公之奉命爲內務府大臣也余以君子小人必不能並列于朝往  
力阻之公感恩圖報知其不可爲而爲之毅然曰世皆疑宮闈爲  
神祕不可測今唯開誠布公與天下共見以誠耳去佞革私其餘  
事也余知公以身許君不復計利害有甘爲犧牲之意矣公入直  
未兩月前後上二十餘疏聖主賢臣同心一德每進見許以忠直  
獎以忠勇嘗一日上三疏有時且索稿袖中密對至日中不退公

方引爲幸事而不知衆皆側目疑忌由是生矣君子爭名小人爭利互相交結危言聳聽百出其鬼蜮之技以相讒阻公首請求賢才疏列數十人以進皆耆舊未及時賢三數人衆乃誣以引新黨而斥舊臣矣公又請一事權主興利除弊不改制不裁人唯先當清理欵項衆乃誣以變亂舊法盡罷親貴並停撤一切度支矣公又請提倡文化蓋以崇文攷古無關政治擬爛皇室博物館設學校建工廠以倡辦教育與慈善衆乃誣以慢藏誨盜且謂別有用心矣凡有建議皆成罪案猶慮不足以動人也於是誣以彈劾師傳矣指斥監國矣甚且誣以飾詔令洩機密幾陷于大不韙矣而不知君子立朝立言有體帝師皇父何以措辭乃不學無術之徒竟聞而信之抑若旦夕眞將不可測者遂有涕泣君前以死要

挾必求去公而後稱快者矣始而假事出之使不得入見繼而借端逐之使無以自明於是公與鄭公孝胥同入爲內務府大臣者皆後先同退矣昔漢文帝議以賈誼任公卿之位絳灌東陽侯雋敬之屬蠹害之短以專欲擅權紛亂諸事使天子疏之楚懷王任屈原上官大夫與之同列爭寵而心害其能因讒以王使屈平爲令衆莫不知每一令出平伐其功嗚呼信而見疑忠而被謗何古今人所遇之如一轍也雖然此不足異也吾讀史記汲鄭列傳汲黯以贊直見憚不能久容於內而鄭當時以貴下人常趨和承意不敢甚斥臧否亦不能久安於位然則事君致身吾行吾素又何樂而不獨爲君子哉今出入內廷者衆矣皆有所禁格不敢多所論列而公以新進疏遠獨竭智盡忠以報故主卒被逐以去可謂

不負其初者矣孤松老人英華

清宮遇變記書後

英華

清宮遇變記記甲子十月九日移宮一事金息侯先生所記也此次之變雖出意外實亦在意中先生固早已預料及之矣先是是年春先生奉命爲總管內務府大臣首以崇文攷古無闕政治請盡發圖書古物設館陳列公諸世界又請延致時賢公同研究以示大公無我之意冲人極以爲然即令草擬辦法派員檢查先行籌備飭訪北京大學諸君子並擬延見蔡熊梁江諸公會議進行事本旦夕可成乃左右羣起抗違使不能行先生旋亦被逐而退遂爾中止此一阻也及旣移宮先生復以敝屣一切還我自由冲人久懷此志常與衆言之何必更受優待請盡捐經費及應得私

產創辦文化教育慈善三大事業廣約中外名流開會公議委託  
代辦而自則出洋遊學以求學識於世界爲將來自立計冲人亦  
頗難之謂非常之變實待非常之才即草宣言約胡適之代爲宣  
佈乃左右又羣起抗違使不能行此又一阻也夫清室爲世注目  
者一虛號一古物耳果如先生之議前策行或可免十月之變後  
策行亦可絕日後之憂而不意再爲衆阻不得弭禍於無形此其  
中殆有天意存焉微聞冲人賢明早自覺悟常慨然曰人貴求自  
立耳予不願爲天囚亦不患餓死今日之變此正天之厚我也我  
敢違乎其對於先生信任尤深既許爲濟變才又稱唯先生有遠  
識能斷大事聞一日嘗手書一腔熱血四字並題其後曰賜金少  
保以賜先生蓋許先生爲今之于少保也先生感念舊恩每言及

常流涕遇變之日越宿髮爲之白其心苦矣是記自移宮日起及幸北府避日使館赴天津皆詳記其實並錄中外各報所登載有傳誤者爲更正之皆不加議論唯對左右侍從據事直書不稍假借主憂臣辱主辱臣死知必有讀是書而汗下者矣余慾惠付刊以觀天下後世之公論先生不允其請謂猶有待也孤松老人英華

王忠愍公哀輓錄書後

金梁

王忠愍公哀輓錄載余所爲殉節記既多未盡而所錄傳略亦各有異同余與公生死交也初至京實主于我往還既密知之尤深又訪談于殉節前三日不可無一言以傳信史也乃強起爲之補傳傳曰公諱國維字靜安號觀堂浙江海寧州人先世籍開封宋

靖康初金人陷太原有副都總管王稟赴汾水死追謚忠壯公其裔也世業儒父乃譽遭亂棄爲賈公生通敏嗜讀少有才名初治詩古文辭入州學遊海上習日本文東渡留學歸主講江蘇及南通師範學校學部調充圖書館編譯協修名詞兼治歐文研幾東西學說闡然自修不自表襮尋棄其所學專心攻國故著述遂多斐然爲世所稱久矣辛亥冬從上虞羅氏避居日本羅氏博古于金石龜甲文字神悟多翔獲每有發端公輒爲會通貫串成一家言故世論今之古學日新發前人所未發啓之者羅氏而成之者公也未幾公先返國寓上海爲廣倉學君主編譯及蔣氏密韻樓題叙藏書癸亥夏奉詔直南書房疏請崇德講學初被阻有旨傳開始得上襄嘗侍聞上論曰新舊論學不免多偏能會其通者國

維一人而已允哉公于古今學術無所不通根底經史由文字聲韻以致制度文物由博以反約由疑而得信不偏不易務當于理凡有造述初若尋常而義精辭確一字不可移易尤善以科學新法理董舊學其術之精識之銳中外學者莫不稱之公勿自矜也甲子之變左右或慷慨論憂辱議生死公獨始終無一言自就清華講席更絕口不及時事近以世變日亟公請行在預謀遷避阻不爲達每語及憂憤幾于泣下公平居靜默不苟言笑數日憤激異常時不意竟自沉于頤和園昆明湖以死預書遺囑藏衣帶中畧曰五十之年只欠一死經此世變義無再辱並遺命藁葬清華塋地嗚呼其志亦可悲矣事聞震悼賜奠予謚蓋特典也公生于丁丑十月二十九日殉于丁卯五月三日得年五十有一所著書

已刊者觀堂集林蒙古史料及羅氏叢刊并別傳于世者如干種  
未刊者集林補編等稿本如干種又遺書手自批校者如干種均  
移藏清華學校先後錄刊別有編目嗚呼公殉節前三日余訪談  
校舍憂憤之辭知已懷必死矣及哭弔于魚藻軒自沉處乃恍然  
復有所感詩曰魚在在藻厥志在餌鮮民之生矣不如死之久矣憂世  
也逸詩曰魚在在藻厥志在餌鮮民之生矣不如死之久矣憂世  
變也惟公之死明明白白不待言矣今之覲然媿生其志在餌者  
對之能無媿死耶余初擬勒石于軒前曰王忠慤公殉節處竟不  
爲典守者所許後死徒悲負公多矣丁卯初秋滿洲金梁

古籀答問書後

柯劭忞

古籀失傳久矣吳愬齋獨悟筆法開前啓後爲世所宗而吾友金

息廬神而明之更入化境超超玄箸卓然自成一家古籀之法于  
是復傳于今矣息廬博通經史精小學尤善篆籀其論古籀曰篆  
籀不同法天圓而地方籀法乎天故筆筆皆圓篆法于地故字字  
皆方又曰金石文亦異趣金文多從籀故圓而取側勢石文多從  
篆故方而作正形又曰籀得其全故鐘鼎文字左右俯仰全器常  
成一氣混然無跡篆得其偏故碑石文字分行布格字字務求工  
整母少通變又曰籀筆務神化其運用全在筆之心篆守規矩其  
刻畫唯在筆之穎夫古今言筆法者曰藏曰中唯知筆鋒而已所  
謂穎也其上者曰撥曰轉曰刷知用筆腹矣而神動天隨得心應  
手能運全力于筆心者今有幾乎嗚呼進乎道矣是編蓋爲答問  
而作張漢卿將軍年少好學嘗從問字息廬以此示之余于息廬

處見將軍所習鐘鼎文頗似窓齋知用力已深息廬亦深贊其精進此道有傳人矣息廬道德文章將軍功名事業足並傳百世此特其餘事一端而已息廬嘗題將軍習字冊曰能自得師語云能自得師者王推是道以行之世亂不足平矣即以此篇爲左券何如膠州柯劭忞

清史太祖本紀贊

金染

太祖生而神武初以甲士十三人起兵旣平諸國大舉伐明不數年間遂成帝業武功之盛古未有也定都瀋陽毅然獨斷不爲衆撓謂西伐明北征蒙東定朝鮮南收羣島唯此獨扼形勢一統之基定于是矣而假名進貢兩入明京覲敵國若無人其英才奇略尤非常人所能及嗚呼豈不偉哉

清史聖祖本紀贊

金梁

聖祖早承大業鋤奸戡亂寰宇統一雖曰守成實同開創焉聖學高深崇儒重道幾暇格物豁貫天人尤古今所未覩而久道化成風移俗易天下和樂克致太平其雍熙景象使後世想望流連至于今不能已傳曰爲人君止于仁又曰道盛德至善民之不能忘嗚呼聖矣哉聖矣哉

清史世宗本紀贊

金梁

聖祖政尚寬仁世宗以嚴明繼之論者比于漢之文景獨孔懷之誼疑于未篤然淮南暴伉有自取之咎不盡由文帝之寡恩也帝勵精求治朝乾夕惕無一日寧嘗歎曰爲君難夫知爲君之難敬天憂民勤勞無逸天下尚有不治者乎

清史宣統本紀贊

金梁

帝冲齡嗣服監國攝政軍國機務悉由處分大事並自太后取進止大變既起遽謝政權天下爲公永存優待遂開千古未有之奇虞賓在位文物猶新是非論定修史者每難之然孔子作春秋不諱定哀所見之世且詳于所聞一朝掌故烏可從闕儻亦爲天下後世所共鑒歟

清史天文志序

金梁

歷代天文志自史記天官書後唯晉隋兩志備述天體儀象星占唐宋加詳皆未盡也至元景測益精明占候較密然彊宇所囿聲教未宏齊政窺璣尚多畧焉有清統一區夏聖聖相承聖祖親釐象數究極精微前後製新儀七測日月星辰則窮極分秒度輿圖

經律則徧歷幅輿世宗復以歲久積差准監臣改用擒圓術高宗又以舊記星紀間有疏漏御製幾衡撫辰儀重加測候迨平定回疆及兩金川復命重度里差增入時憲理明數確器精法密自古以來所未有也今爲天文志備載推驗之法其天象昭垂見於歷朝紀錄及所司載記者亦悉書之乾隆六十年以後國史無徵則從闕焉

清史兵志序

金梁

有清以武功定天下太祖高皇帝崛起東方初定旗兵制八旗子弟皆入尺籍不啻舉國皆兵焉太宗征藩部世祖定中原八旗兵力最强聖祖平南服世宗征青海高宗定西疆以旗兵爲主而輔之以祿營仁宗剿斂匪宣宗禦外寇兼用陸軍而以鄉兵助之文

宗穆宗先後平粵捻湘軍初起淮軍繼之而練勇之功始著至是  
兵制蓋數變矣道咸以後海禁大開德宗復立海軍內江外海與  
水師並行而練軍陸軍又相繼以起擾攘數年卒釀新軍之變以  
兵興者終以兵敗嗚呼豈非天哉今作兵志一曰八旗二曰綠營  
三曰防軍四曰陸軍五曰鄉兵六曰土兵七曰水師八曰  
邊防九曰海防十曰訓練十一曰製造十二曰馬政並分著於篇

清史藝文志序

改  
金梁

清起東陲太宗設文館命達海等繙譯經史復改國史祕書弘文  
三院編纂國史收藏書籍文教始興世祖入定中原命焉銓等議  
修明史復詔求遺書聖祖繼統詔舉博學鴻儒修經史纂圖書稽  
古右文潤色鴻業海內彬彬向風焉高宗再試鴻詞博采遺籍特

命輯修四庫全書以皇子永瑢大學士于敏中等爲總裁紀昀陸  
錫熊等爲總纂與其事者三百餘人皆極一時之選歷二十年始  
告成全書三萬六千冊繕寫七部分藏大內文淵閣圓明園文源  
閣盛京文溯閣熱河文津閣揚州文匯閣鎮江文宗閣杭州文瀾  
閣命紀昀等撰全書總目著錄三千四百五十八種存目六千七  
百八十八種復命于敏中王際華等擷其精華別爲四庫薈要凡  
一萬二千冊分繕二部藏之大內摛藻堂及御園味腴書屋又別  
輯永樂大典三百八十五種交武英殿以聚珍版印行其宋元精  
槧多儲內府天祿琳瑯備詳宮史經籍既盛學術斯昌文治之隆  
漢唐以來所未逮也時阮元旣補四庫未收書四百五十四種復  
刊經解一千四百十二卷王先謙後又續經解一千三百十五卷

而各省督撫廣修方志郡邑典章粲然大備其後曾國藩倡設金陵蘇州揚州武昌杭州官書局張之洞設廣雅書局于廣州延聘儒雅校刊羣籍而私家輯刻尤多叢書之富曩代莫京及至晚近歐風東漸競譯西書道藝並重而敦煌寫經殷墟龜甲奇書祕寶攷古所資亦大有裨于學術實集古今未有之盛焉藝文舊例胥列古籍茲仿明史爲志凡所著錄斷自清代唯清人輯古佚書甚夥不可畧之則坱甸各類之後

清史稿文苑傳序

金梁

清代學術超漢越宋論者至欲特立清學之名而文學並重亦足於漢唐宋明以外別樹一宗嗚呼盛已明末文衰甚矣清運既興文氣亦隨之而一振謙益歸命以詩文雄於時足負起衰之責而

魏侯申吳山林遺逸隱與推移亦開風氣之先康乾盛治文教大  
昌聖主賢臣莫不以提倡文化爲已任師儒崛起尤盛一時自王  
朱以至方惲各擅其勝文運盛衰實通世運此當舉其全體若必  
執一人一地言之轉失之隘豈定論哉道咸多故文體日變龔魏  
之徒乘時立說同治中興文風又起曾國藩立言有體濟以德功  
實集其大成光宣以後支離龜雜不足言文久矣茲爲文苑傳但  
取詩文有名能自成家者彙爲一編以著有清一代文學之盛派  
別異同皆置勿論其已見大臣及儒林各傳者則不復著焉

清史遺逸傳序

金梁

太史公伯夷列傳憂憤悲歎百世下猶想見其人伯夷叔齊扣馬  
而諫既不能行其志不得已乃遁西山歌采薇痛心疾首豈果自

甘餓死哉清初代明平賊順天應人得天下之正古未有也天命既定遺臣逸士猶不惜九死一生以圖再造及事不成雖浮海入山而回天之志終不少衰迄于國亡已數十年呼號奔走逐墜日以終其身至老死不變何其壯歟今爲遺逸傳凡明末遺臣如李清等逸士如李孔昭等分著于篇雖寥寥數十人皆大節凜然足風後世者也至黃宗羲等已見儒林傳魏禧等已見文苑傳餘或見于孝友及藝術諸傳則當比而觀之以見其全焉

清史張勳康有爲列傳論

金梁史稿是卷爲人抽易故刪刊于此餘不盡錄

光宣兩朝世變迭起中國可謂多故矣其事皆分見于紀傳斷代爲史辛亥以後例不能詳唯丁巳復辟甲子移宮實爲鼎革後兩大案而勳與有爲又與清室相終始亦不可遂沒其人明末三王

及諸遺臣史皆勿刪今仿其體並詳著于篇庶幾攷有清一代之本末者有所鑒焉

清史稿校刻記

金梁

甲寅年始設清史館以趙公爾巽爲館長修史者有總閱總纂纂修協修及徵訪等職先後延聘百數十人別有名譽職約三百人館中執事有提調收掌科長及校勘等職亦逾二百人可謂盛矣開館之初首商義例館內外同人如于君式枚梁君啓超吳君士鑑吳君廷熒姚君永樸繆君荃孫陶君葆廉金君兆蕃朱君希祖袁君勵準王君桐齡等皆多建議參酌衆見久而後定議用明史體裁略加通變先排史目凡本紀十二曰太祖太宗世祖聖祖世宗高宗仁宗宣宗文宗穆宗德宗而宣統紀初擬爲今上本紀後

改定志十六曰天文災異時鑑地理禮樂輿服附鹵簿選舉職官  
食貨河渠兵交通刑法藝文邦交初擬有國語氏族外敵三志皆  
刪表十曰皇子公主外戚諸臣封爵藩部大學士軍機大臣部院  
大臣疆臣交聘初以大學士與軍機合稱宰輔後改列傳十五曰  
后妃諸王諸臣循吏儒林文苑疇人忠義孝義遺逸藝術列女士  
司藩部屬國初擬有明遺臣卓行貨殖客卿叛臣諸目皆刪併其  
取材則以實錄爲主兼采國史舊志及本傳而參以各種記載與  
夫徵訪所得務求傳信不尚文飾焉庚申初稿略備始排比復輯  
丙寅秋重加修正自開館至是己歲紀一週其難其慎蓋猶未敢  
爲定稿也丁卯夏袁君金鑑刲刊稿待正之議趙公韙之即請袁  
君總理發刊事宜而以梁任校刻期一年竣事梁擬總閱全稿先

畫一而後付刊乃稿實未齊且待修正祇可隨修隨刻不復有整理之暇矣是時留館者僅十餘人於是公推以柯君劭恣總紀稿王君樹枏總志稿吳君廷燮總表稿夏君孫桐金君兆蕃分總傳稿而由袁君與梁校閱付刊本紀自太祖至世宗五朝爲鄧君邦述金君兆蕃原稿高宗至穆宗五朝爲吳君廷燮原稿德宗及宣統二朝爲瑞君洵原稿而太祖聖祖世宗仁宗文宗與宣統六紀爲炳君良復輯穆德二紀爲李君哲明復輯柯君皆多刪正志則天文時憲災異爲柯君稿地理爲秦君樹聲原稿王君樹枏復輯禮爲張君書雲王君大鈞萬君本端等分稿職官爲金君兆豐駱君成昌李君景濂徐君鴻寶等分稿皆金君復輯樂爲張君采田稿輿服爲何君葆麟稿選舉爲張君啓後朱君希祖袁君勵準等

分稿張君書雲復輯食貨爲姚君永樸李君岳瑞李君哲明吳君懷清分稿河渠爲何君葆麟等原稿交通爲張君啓後羅君惇震等分稿皆吳君復輯兵爲俞君陞雲秦君望瀾田君應璜袁君克文等分稿俞君復輯刑法爲王君式通等分輯後用許君受衡稿藝文爲章君鉅吳君士鑑原稿朱君師轍復輯邦交爲李君家駒吳君廣霈劉君樹屏等分稿戴君錫章復輯表則諸王公主外戚爲吳君士鑑原稿諸臣封爵爲劉君師培原稿軍機大臣爲唐君邦治原稿餘皆吳君廷燮稿列傳則后妃諸王爲鄧君琰君及金君兆蕃原稿皆金君復輯諸臣原稿凡在館諸君多有分纂自開國至乾隆爲金君兆蕃復輯嘉道咸同爲夏君孫桐復輯光宣爲馬君其昶金君兆豐復輯而梁又重補輯之循吏及藝術皆夏君

復輯儒林爲繆君荃孫稿文苑爲馬君稿梁皆補之疇人爲陳君  
年原稿柯君復輯忠義爲章君復輯孝義及列女爲金君兆蕃復  
輯遺逸爲王君樹枏及繆君原稿梁復輯之土司爲繆君稿藩部  
蒙古爲吳君廷燮稿西藏爲吳君燕紹稿屬國爲韓君樸存稿凡  
諸稿梁皆校閱並有參訂惜倉卒付刊不及從容討論耳昔萬季  
野參修明史總閱全書事必覈之實錄誤者正之漏者補之此修  
史公例不敢忽也是秋趙公去世柯君兼代館長一仍舊貫歲暮  
校印過半乃先發行至今夏全書告成幸未逾預定之期袁君潤  
議於先經營籌畫力任其難庶幾無負趙公之託其間數經艱亂  
皆幸無阻良非初料所及一代國史所關甚大其成否亦繫乎天  
焉初有議宣統紀從闕者梁以春秋不諱定哀力爭存之又譏斷

代爲史凡歿於辛亥以後者皆不入傳梁以明末遺臣史皆並著且清史實爲舊史結束後將別創新史體例各異諸人與清室相終始豈容泯沒故所補獨多校刻既竣略記始末以備參考史稿本非定本望海內通人不吝指教當別撰校勘記爲將來修正之資幸甚幸甚戊辰端節金梁

建州表書後

金梁

建州自明永樂初設衛阿哈出始爲指揮使猛哥帖木兒同時並起析置左衛尋爲七姓野人所殺正統中子董山襲別設右衛授其弟凡察成化年董山復遇害子脫羅襲表列年世甚詳也世乃以猛哥帖木兒名近肇祖疑之而以董山當肇祖子充善脫羅當充善子妥羅又以凡察謂即清先代之范察音似矣而年世及事

實不能符也清史阿哈出傳論謂清先代遭亂幼子范察得脫數傳至肇祖始克復仇而猛哥帖木兒乃被戕于野人安所謂復仇若以范察當凡察凡察又猛哥帖木兒弟也不得爲數傳之祖又后妃傳稿注若謂凡凡察即是范察則由范察數傳始至肇祖肇祖至太祖又閼六世世次相望僅及百年理亦難通皆確論也唯太祖曾受明都督敕書封龍虎將軍此不必諱若必一一指實強爲之說自誣誣人又何取耶是表自永樂元年起至萬曆三十九年止凡建州三衛事可攷見者皆著于篇紀述明確足傳信史故特爲叙而刊之滿州金梁

后妃傳稿書後

金梁

后妃傳稿上下二卷張孟敏采田撰亦爲清史作也史稿所刊爲瓜圃叢刊叙錄續編

金錢孫兆蕃復輯審慎簡覈期與他傳一律而是稿叙事獨詳尤

多攷訛如孝莊文皇后孝獻皇后諸傳皆有辨正足闢傳聞之誣

誠史筆也案下嫁之說張煌言建夷宮詞春官昨進新儀注大禮

恭逢太后婚寶啓其端實則是時攝政王適以皇叔父納繼妃世

俗或有太后之稱孝莊知書明禮首重倫常不待辨而知其誣孝

獻爲董鄂氏內大臣鄂碩女世祖御製行狀甚明梅村所賦別有

感觸何關正史後世浮談更不足論矣是稿余刊史時初未見後

楊子勸鍾義與哲嗣鑑資懿淶始屬續刊與史稿並傳憶清史樂

志亦孟敏所撰攷述頗精余甚重之今復得是稿雖未及編入清

史而別本單行亦足補正史所不足館存副稿尙有多種倘能彙

輯而盡刊之以備參攷豈非快事歟戊辰夏金梁

國史館忠義傳目叙

金梁

國史立傳舊例先起草繼定稿進呈御覽然後畫一爲正本嘗數十年一重修檢史館存稿列朝大臣傳爲多唯光宣後未齊偶存草本均待修正循吏傳已續修四次儒林文苑皆再修而忠義傳續修十餘次前後多至八千餘人其文武一二品以上列入大臣傳者猶未在內也清史分纂忠義擇其事功較著者正傳僅列二百餘人增傳倍之蓋不足原稿十之一刪者多矣初尙存其名于序內後亦盡刪而僅著其人數余擬彙忠義全稿刊之以篇頁過多不克如願乃先錄傳目詳列姓名略注里籍事跡其已入清史者亦注之原稿尙存史館後之覽者按目以求庶可復得其詳歟又大臣傳稿亦刪削不少並擬補錄傳目以存其略國史館舊稿


紀傳志均全及實錄底本久藏書庫爲一朝史料所歸余初擬設史料整理會延集同人清理保管永存公覽倉卒未及行而遽出都所望後來好古之士急起圖之勿使散失則大幸矣金梁

清史例案叙

金梁

清史初開館余建言于趙館長曰當先定大綱以實錄爲本即就國史舊纂本紀列傳各志闕者補繁者刪討論潤色整齊而畫一之三年可成書矣余既度遼聞館議紛紜義例未定而已着手纂修紀傳志表各以己意爲之逾十年積稿盈百十箱充滿數屋而成書尙無期也及余還京趙館長躬自訪聘談次始聞例目略定方從事排比然以初稿雜亂既多重複而闕漏仍不少自歎衰老不易觀成頗惜前議而已不及行矣去春袁潔珊瑚議刊稿待正

遂總發刊而以<sup>梁</sup>總校閱排印蒞館偶檢存檔得文函多件皆關於商議義例者裒然成帙乃歎趙館長經營擘畫之勤終不可及也史稿既成爰仿明史例案復取是卷編次之名曰清史例案分三卷上卷爲史館先後所定例目及規章中卷爲館內外同人條列議案下卷爲各處論事往來書函而以發刊後更正書增之蓋今夏史稿刊竣存館待發輒復爲人抽改如列傳第二百六十卷張康台傳竟刪去而以前卷割而爲二以充卷數餘亦不免竄易不能不起而正之也幸携奉所發者尚在其先皆照原刻書出僅閱月而已有闕內本闕外本之別矣不可怪哉恐後世讀者或以爲異故增言之于此戊辰冬息侯金梁識于奉天通志館



金少保息侯先生道德文章海內景仰所輯瓜圃叢刊曩刻敍錄  
得者寶之曾不數日萬帙爲罄溥媿增師門姑隱於吏近典昌監  
適有印刷一科畧事整理勉可製書乃請重刊並知輯有續編一  
併付印愆愚月餘強而後可捧稿歸刻手自校勘幸已告竣書出  
行世非特爲攷古者所重視而與人心世道亦大有關係倘亦天  
下有心人所共許歟受業王德溥謹跋

